

列朝詩選

卷式柒

吳寬
王鏊
程敏政
儲瓘
吳儼
陸深

李應禎
文林
呂憲
陸容
楊循吉
趙寬

王弼
陳章
王佐
謝省

列朝詩集

丙 集 二十七

列朝詩集

丙集第六

吳尙書寬一百五十九首

王少傅鏊三十八首

程侍郎敏政四十二首

儲侍郎巖六十二首

吳尙書儼三首

陸詹事深九首

李少卿應禎四首

文溫州林一十首

呂太常憲三首

陸叅政容三十三首附兒子仲二首

楊議部循吉三十一首

趙按察寬二首

王興化弼三十三首

陳高州章三首

王山人佐四首

謝省一首

吳尙書寬

寬字原博長洲人爲諸生蔚有聞望徧讀左氏班馬唐宋大家之文欲盡棄制舉業從事古學部使者迫促乃就鍾院試成化八年會試廷試俱第一入翰林累遷至掌

詹禮部尙書司內閣誥勅弘治十七年卒於位贈太子少保諡文定先生經明行脩
頽然長德學有根抵言無枝葉最好蘇學字亦酷似長公而其詩深厚醞郁自成一
家少壯少學老而彌篤所藏書多手鈔有自署吏部東廂書者蓋六十以後筆也服
官禁近三十餘年前後奉諱家居不滿六戴風流弘長沾丐閭里迄于今未艾吳人
屈指先哲名賢搢紳首稱匏翁布衣首推白石翁其他或少次矣匏庵集七十卷手
自編輯匏庵者先生之自號亦以老居臺閣不得大用蓋用以自寓云

次韻周原已懷石湖舊遊

上方高處共捫蘿落木空山雨滿簑野寺推門賣葉亂湖亭倚棹白雲多向來行樂
成陳夢別後離愁遠綠波滿紙新詩更清省令人相對憶陰何

送俞振宗南遊

手扶藜杖出南園不向婁亭告一言白髮破肩過浙水青山回首隔吳門平蕪客路
何時盡喬木人家幾處存此去越中憐歲暮錦袍應見故人恩

雪夜憶友人宿伏龍山中

孤城鐘漏促寒雞風雪殘燈夢欲迷靜夜獨眠高榻上故人遙在數峰西空林松子
時時落絕磴梅花樹樹低知是山中有佳興柴門清曉候封題

次韻啓南淫雨

陽氣渙不收淫雨夜復晝倒傾恠盆翻併集疑輻湊鳩婦頻見離蛇醫頗遭詬日月
何道行雷霆半空鬪顧無大藥資已彼太虛疔下堂褰裳齊出戶縮頸脰相忘魚
南洋並坐鳥栖宿不辨過河牛時看挂樹雌乞漿歲在西祭社日惟戊民謠適厚誣神
賜誠大繆攸除荆室完既瀦白渠溜叵將說甄盛強把桔槔救具棹防陸沉移書緣
屋漏因之憫大田豈暇念靈囿荷簑徒水畔瘳縛休火耨溪毛遶宅生田稗幾家茂
竈沉或浮釜墻覆乃失霑湯湯成其咨蕩蕩孰能諫斯倉不成千厥賦難平蕘空聞
田峻喜亦笑樞郎恂積惡等貫盈飲酒比多又極備固有由太甚不可復往日害未
消今歲勢仍驟槁項入口饑疾首兩眉皺神禹合胼胝蒙莊念昏瞶地志費推尋水
經慵句讀出門一壺隨俯井尺繙收花姬首夜膏石丈齒朝漱彼蒼有聞知下土敢
陳奏朝廷闕四門刑罰謹三就聽政厭衡石祈年餽籩豆誰召淮吳裁復致川廣冠

居人廢鋤犁行者耀甲冑赤子困泥塗蒼生脫衣袖米價市上騰錢神橐中走寫帖
顏腹空題詩沈腰瘦况茲雨再零絕類人多疾否塞求疎通崎嶇戒顛踣幸有客露
冕豈乏人衣繡發廩在斯今爲府合仍舊肯從芻蕘詞急向膏盲灸莫厚庶以寧不
備遂全覆滂沱免月離霖霖應春候因地脩厥利自天獲多祐漸墾千畝連卒致萬
家富吳沼尙無虞蜀天底須恆頓如元豐間不落貞觀後永圖幸勿忘膚見奚足徂
一挽康年回吾邦即非陋

題何刻工卷

女媧補天天不漏卷石猶穿太山溜郢工運斤風欲生斲出難供孫楚漱雲根可斷
亦可轉磨礱幾日方成就梁州之貢天下無忽然躍出東山袖頌功載德絕妙辭兩
手不停煩刻鏤丞相中郎字奇古右軍率更筆深秀東山雖老眼猶明一一猶能論
結構空堂考擊聲丁丁絲連鏤綴如絺繡小或蠅頭大或丈深必因肥淺必瘦東山
擇業何其賢古人石刻今流傳周宣中興文石鼓李唐九成銘醴泉延陵墓上止十
字薦福寺裏須千錢行人汨墮峴山下過客手摹江水邊其餘諸刻難盡述東山直

視如無前百年獨守三寸鐵姓名與石同貞堅回看巧技未旋踵肆中野草浮荒煙
昌黎河東如可作梓人坊者堪同編只今東山既頽矣子孫守之上慎旃閉門一日
白石爛黨人之碑慎勿鐫嗚呼黨人之碑慎勿鐫千載之美無使安民專

病項

人生自召白一病傷彼六欲兼七情我今有病出偶爾開口欲說難爲名幸非寒戰
與潮熱一痛却使心忪忪籟條戚施古人疾二者一旦來相嬰執書未暇矻矻坐伏
枕頓作啾啾聲千鈞重負未容釋更覺肩背遭笞榜董宣不屈漢公主徐積已見胡
先生昨朝向人忽作別卽欲回顧仍前行昂頭莫肯少輕諸側目欲就多歡迎我生
自來汎掘強只今見者尤加驚獨鶴引吭頻飲啄大鷄盛氣相喧爭嗟吁元首本無
恙股肱何不思扶傾端愁蔓延入骨髓此病始知爲匪輕軒岐醫經動盈卷不諱何
藥堪煎烹莫如閉戶學導引動盪血脉方和平未能痛定得思痛把筆遣悶詩先成
題朱澤民小景并詩後

睢陽畫癖不可醫睢陽作畫眞畫師豈惟長絹善揮灑只此短紙誰能爲野曠天寒

氣蕭爽人坐茅亭絕塵想階前舊雨客不來天末晴雲心獨往青山滴滴青於苔平地忽見芙蓉開秋聲似向耳邊起石上喬松若箇裁意長要在無多筆餘墨淋漓綴唐律詩中有畫畫中詩百年再見王摩詰

悼沈癯樵畫史

秣陵春色厭驅馳投老吳門白髮垂燈下解衣盤礴處山中持斧嘯歌時一貧比憲元非病三絕如虔不數癡落日高堂開障子雲峰烟樹使人悲

書旬容丁溪僧舍壁

丁公溪上古招提策馬來尋路欲迷遠道黃埃臨水隔當門綠樹與雲齊山中地僻無人到窗下僧閒鳥自啼淪茗焚香坐終日不知林外夕陽低

悼董益珍

獨持古道作今人白首峨冠稱隱淪垂老不堪三月病移家空是一生貧篋中書帙悲遺墨窗底棋枰積素塵深巷東風花自落扣門無復過西隣

濟寧夜泊

嗚嗚畫角語城頭
暝色蒼茫倚舵樓
古戍烟生人已散
長河月落水空流
異邦信美非吾土
他日重來是舊游
千里鄉心孤枕上
可能今夜夢刀州

過大姚陳玉汝宅飲散宿大覺寺追和趙興哲韻

月出平湖積水空
上方仙梵隱花宮
似聞薔薇林間雨
總是芙蓉浦外風
有客題詩先我到
向僧分榻幾人同
敲門自怪來何莫
投轄傳盃惱孟公

吳節婦

十八來澁灘雙魚水中居
七年一彈指水中有枯魚
妾身既無夫妾心惟有死
婉婉錦棚中奈此兩女子
白月照空閨啞啞烏夜啼
天明不飛去肯向西林樓
九泉望不極莫化江邊石
化石石雖堅可轉亦可泐
年年過蠶月是妾紡織時
只將兩行汨抽作千丈絲
生爲吳氏婦死爲吳氏鬼
子不如我信有如澁灘水

題楊鐵崖墓銘後

泰定年間名進士
會稽山下老徵君
金陵不看三秋月
玄圃長噓五色雲
對客呼兒將鐵笛
從人笑我醉紅裙
風流盡付吳淞水
還繞劉伶四尺墳

題院畫二首

翩翩白馬紫絲韁馳過彎堤十里長
千樹桃花萬株柳前頭宮殿是昭陽
瑤樓金屋映丹霞只把仙家比內家
落日美人秋水紅粧一面亂荷花

鍾馗元夜出遊圖

終南老馗狀醜醜虎韉烏弁鴨色袍
青天白日不肯出上元之夜始出爲
遊遨鬼門關頭月輪高烏撻背穩如
駮駮鬼婦塗兩頰鬼子垂一髮徒御
雜沓聲嗽嘈導以靈姑旗翼以大食
刀茶壘左執鞭質矯右屬囊乃明前
持漆燈張若後擁輦旄離未罔兩不
可一二數肩擔背負手且操奇形獐
色使人怕一似獶駁臬獍兼猿猱戰
傷人血化燐火各出照地點點如焚
膏陰風颯颯吹荒阜百恠屏氣不敢
號汝輩遠遁莫我遭我欲飲汝血甘
如飲醇醪我欲啗汝肉美如啗羊羔
官容汝輩在世長貪饕吁嗟乎老馗
眞爲百鬼中一豪所以唐皇想其像
詔令道子寫以五色毫吾嘗疑其事
展圖不覺再把短髮臨風搔憶富天
寶年左右皆鬼曹林甫朝中逞狐媚
祿山殿上作虎嘯當時設有老馗者
安得縱彼二鬼逃便須縛以蒼水使
者所捫之赤縑獻于

天闔尸諸獸牢寢其皮拔其毛效爾一日驅馳勞坐令溫泉生汙泥驪山長蓬蒿上
除唐家百年害下受唐史千年褒却來上元夜任爾燒燈并伐礮

送胡彥超

年過四十不作官還將短髮籠儒冠平生一經已爛熟胡爲挾入橋門觀前年鄉書
名始刊曲江又避春風寒重來橋門住三載打頭矮屋聊盤桓朝齏暮鹽不滿盤何
須故人勸加飡日高對案笑捫腹自有五色之琅玕側身西北望長安眼中一朵紅
雲團天門欲往澁如棘若比蜀道尤云難嗟哉出處誰得似頗似吳下吳生寬吳生
作詩忽盈紙送君還到春闈裏春闈多士多如蟻勿將老少分憂喜君不見韓昌黎
張童子同是陸公門下士昌黎文章如噉日童子聲名逐流水人生傳世有如此區
區科第何難耳

送張都水

幽燕建都邑九鼎從而遷入政一日食仰此東南偏歲漕四百萬舳艫相後先雲帆
罷轉海江淮達且沿迤邐經齊魯有渠昔人穿噫此尋丈耳譬若溝澮然置牖以啓

閉相時爲節宜巖巖魯山下平地多流泉流入漕渠其始纔涓涓滄淪惟自足安
知可浮船疏導非人力濟世嗟何緣張君官水部治水思昔年往來相度之滌源同
九川功成旣歸朝大臣慕其賢封章始朝薦行李仍夕旋維此百泉眼利博人爭傳
入渠有餘瀝可溉萬頃田只今東方民老幼咸顛連槁項與黃馘嗷嗷口流涎瀦洩
倘有策旱澇何須憐漕粟國用足種粟民生全他年司馬氏載入河渠篇

次韻顧天錫九日病起

重來不是舊劉郎籬菊都從病裡黃小院入愁雙杵外故鄉歸夢一燈傍詩家供給
山當戶客鬢侵陵樹着霜明日也須扶杖出呼童已製錦爲囊

與啓南游虞山二首

我本不飲人愛山如愛酒春遊亦易事出戶卽掣肘決策爲此行所幸得良友譬彼
足病弱扶掖乃能走虞山遙在望豈意落吾手側足亂石間縱目平湖口賞心雖云
樂弔古悵然久丹井事有無刻銘覆華構如何梁昭明書臺蔽林藪山下有葛洪丹

井宋學士景濂爲銘又有昭明太子讀書臺

斜日下嶺西落霞滿川上晚色催人還輕舟復搖漾佳山難爲別持酒忽惆悵悠然
一回首舟尾疊青浪故人知我懷提筆寫其狀懷土心未除移山力何壯便如王維
詩終南亦堪望流觀入中夜鼓枻起高唱

謁韓蘄王墓

家國何多難推尋爲蔡童嬴秦方逐北周室竟遷東江左朝廷在淮南驛騎通天終
憐宋土時則有韓公一劍橫天外諸酋在目中南雲當箭鏃黃蓋走艨艟伐越期成
霸于潛恥會戎蕭牆狼跋盡野穴鼠羣空聚米籌三鎮開門待兩宮齊王眞濟美鄂
國與爭雄有詔從中制惟詩詠內訌閒游嗟我獨和議約誰同殉葬長弓勁題銘片
石穹龜趺呈細刻龍額表孤忠草樹樵蘇斷梁盛享祀豐神靈懸皎日生氣亘長虹
異代今全盛當論保障功

懷脩竹書隱

春寒漠漠雨溟溟假寐書床午夢醒十載客居便巷陌一時鄉思繞園亭繁花照檻
知堪賞亂石鈎衣憶所經恰有古苔三畝綠都來脩竹萬竿青當窗好鳥通人語挂

樹危藤學字形日射非畦朝可剪香凝椶室畫常扁鹿場舊築猶存號鶴冢新封未
刻銘架上殘編歸擬讀移文不待北山靈

謝孔昭臨黃大癡畫

大癡道人避世士移家舊隱虞山裏早年能畫老入神落筆虞山宛相似深林依稀
村塢重水口近與昆湖通高岡硯碇勢欲墮此老前身黃石公百年以後誰其亞昔
者吳門稱老謝案頭臨畫似臨書咄咄逼人真可詫風流前輩杳難攀謔語空傳謝
疊山窗中遠岫依然在天際春雲仍自還孔昭善寫山自稱謝疊山

詠邵文敬所藏轉刀

鑠金巧思出工倕獨抱機心展轉危報主久知深自許授人難辨倒相持筆端字悟
藏鋒妙囊底錐嫌脫穎遲詩社埋頭羞銳進吳箋一割尙差差

詠湯姬

笑汝皤然似一公窮冬相伴勝房空三緘口不思援上九轉腸應爲熱中詩詠懷春
同少女禮云當夕稱衰翁平生知足渾無辱不恨孫弘布被蒙

次韻答賓之作書戲效拙體

書家新樣出眉山若擬丰姿定玉環硯沼百坡空對影管城一孔但窺斑臨模惡扎
勞唐楮結構奇材得魯般此意亦知聊戲我試看攬奪語尤頑來詩小序有勿怪攬
奪蘇家行市之語

答于喬次韻謝送冬筭

西郭清風碁墅開門前俗物敢持來聊供香飯抄雲子爲想長鑱斲雪堆空腹冷含
金瑣碎壯心未怯玉崔嵬知君能畫非饒守乞與鵝溪絹剪裁

次韻謝凌季行送新釀六尊

寒掩蓬門午不開東隣新釀叩門來黃封內法何從授紅印他家自滿堆飲量笑添
清滄闊吟肩醺聳玉山嵬青州舊例今重舉從事多能未減裁

病目夜坐懷齋居諸公次前韻

布衾寒擁對床屏鵲遶南枝月過庭暝目誰除子瞳障齋心自比太常醒花時漸好
仍籠霧燈節相催屢問星俗傳元夕晴初入夜看參星便有玉堂天上意銅鑪當案

冷烟青

次韵鼎儀世賢問予病目

藥裹長隨老杜居全憑坐客誦方書巖前激電空聞爛屋上繁星頓覺疎遙望未能
知匹馬不祥幸免見淵魚詩家善謔坡應爾旅館清齋澤也如似說北門春色近試
分東壁夜光餘煩君漫舉盧仝事此事非予却是渠時玉汝得子誤以見戲

觀奕

高樓殘雪照棋枰坐覺窗間黑白明袖手自甘終日飽苦心誰惜兩雄爭豪鷹欲擊
形還匿怒蟻初交陣已成却笑面前岐路滿蘇張何事學縱橫

觀製雨篇

作軒未料宛丘長簷下增修匠石良坐倚前楹天忽遠步當平砌午偏涼白雲就宿
看逾穩急雨來催信不妨敢與蘇家論擇勝半間難遣十夫將

壬寅正旦侍班

爐烟如霧藹彤墀半啓金門複道危只尺星辰華蓋轉中間日月袞衣垂普天鳳曆

開寅歲平旦鷄人報卯時御座不勝袍笏近侍臣偏識漢朝儀

次韵答同年邵汝學約過園居

觸熱相過敢憚煩會呼童子掃蓬門俗流未許通車馬年契長期到子孫已儼置棋
剝木局旋教開酒擊泥尊荒園半畝清風足他日應消楚客魂

二答李士英

堂成圻者更相煩只尺牆東別置門長願清風分故舊獨尋芳草憶王孫士英出唐
宗室後楚人預約空詩帖吳客難言乏酒尊荒徑寂寥春去遠倚闌還用弔花魂

三答劉道亨

坐待劉叉洗熱煩雪車氷柱早臨門自憐學圃空稱老誰似登堂累抱孫杜子刈葵
蔬入饌陶翁收秫酒盈尊弈場莫謾誇能事高着還當惱醉魂

四答胡彥超

園丁頻遣愧勞煩菜壟清陰已滿門車過陳平多長者官如胡質有諸孫小堂定擬
虛中席內府初停給上尊翰林每歲五月至九月例不給酒不怪連朝風雨惡暑天

眞爲洗詩魂

五答李賓之

菴居聯詠舊曾煩詩令嚴來豈棘門欲繫苦匏同賤子
李有詩云庵居如可借吾亦繫吾匏每誇仙李得賢孫過街莫放追風驃
李嘗墜馬對影須開問月尊不是葛洪川畔路李源休覓舊精魂

六答楊應寧

池上揮毫思不煩忽傳詩句到柴門官聯賈至稱中舍字許楊脩識外孫西郭向人空折簡東堂延客已開尊杏園舊例推年少風雨孤村莫斷魂

雪中李世賢招觀東坡清虛堂詩眞蹟

茫茫巨海流銀沙光分民舍并官衙詩人說詩等說法四坐繽紛天雨花寥寥小巷絕人蹟誰肯拄杖過吾家曲中合沓失朱鷺谷口聯翩多白鴉青葱搖落上林苑一夜亂綴瓊瑤葩故人相送定石炭惡客好飲惟江茶清晨忽報有蘇墨折簡邀看門頻搥形疑蝦蟆似曾壓技癢蟣虱誰爲肥料知刻本來廣右醉筆漫滅猶堪嗟坐當

大雪發長笑新酒正熱浮紅霞

是日往觀果刻本蓋世賢招飲恐客不至故給爾乃復次韵

出門騎馬踏雪沙玉堂吏散成空衙何人手剪吳江水而我自眩梁園花客居長至
歎寂寞賴有東鄰仙李家試開泥尊香潑蟻却笑石本光翻鴉清虛堂中事已往妙
墨零落隨風葩空腸啖盡元脩菜渴吻煎徹庭堅茶詩成一紙來萬里峒石至今椎
密搗濃書鏤把純絲裊深刻蟹上潮泥爬似人可喜非浪語與客爭觀還共嗟莫言
此幅字漫滅夜久屋壁飛晴霞

明日世賢持啓南雪嶺圖索題復次韵

小徑升堂新築沙退朝無事還私衙誰移雪嶺入我屋老眼白日疑昏花坐游未覺
足力倦條過野店仍山家淺溪舟膠集凍鴨空谷屢響翔饑鴉狂風入林一攪動零
落玉蕊兼珠葩此時誰掃林下白急欲往煮僧房茶忽然仰面見高寺扣戶還須持
馬撾長安十年走薄宦對此似將塵土爬西湖尋僧天欲雪蘇子故事今人嗟清虛
舊韻更可借捧硯獨無王子霞

偶見元李希遷提舉遺墨乞歸賓之蓋希遷其先世也因賓之作海月菴記
爲謝以此酬之

遺墨持歸走僮僕想見開緘重薰沐百年珠玉慨沉埋袖拂蛛絲光奪目遂令短紙
一尺餘價壓書巢三萬軸乞鄰與人真自慚藝苑酬功百言足夜歸解帶不成眠海
月亭亭當矮屋琅然烏鵲忽驚飛月下新篇已堪讀湖湘文種傳一家前有希遷後
懷麓吳人再結文章緣几上分明留此幅錦囊收貯莫教遲俗子無知將手觸後世
諸孫更好文還向吳人獲珠玉

粉丸

淨淘細碾玉霏霏萬顆完成素手稀鬚上輕圓真易拂腹中磊魂更堪圍不勞劉裕
呼方旋若使陳平食更肥既飽有人頻咳唾席間往往落珠璣

油飴

膩滑津津色未乾聊因佳節助杯盤畫圖莫使依寒具書信何勞送月團曾見范公
登雜記獨逢吳客勸加飡當筵一嚼誇甘美老大無成憶胆丸

題海虞錢氏所藏王均章虞山圖

均章名珪號中陽老人。生元盛時，年未四十棄官歸虞山之下，慕丹術，尤遂於醫。所著有泰定養生主論等書，年餘九十而卒。見吳思庵跋。

扁舟昆湖去，憶向虞山還。當時迫日暮，未得窮躋攀。至今三短章，寂寥不重刪。安知六載後，依然見茲山。諒無愚公愚，賴有頑仙頑。仙隱居處深，林置柴關丹。竈火常伏藥，蘭苗載芟高。情付縑素丹，青色斑斑茲山臥。平野隱然不成環，逶迤亦甚遠。攢蹙何其慳，只尺見百里。羣峰互垂鬢，飛鳥歸易沒。浮雲出偏閒，拂水最奇麗。空巖故漩澗，天風或稍定。石壁仍潺潺，仙宮對佛寺。妙境非人寰，獨憐仲雍墓。誰爲剪榛菅，短棹載書卷。浩歌水雲間，彷彿歸庵翁。往來寶嚴灣，竊祿本無補。乞身亦多艱，臥游畢舊願，坐嘯開塵顏。

題厓山大忠祠四首

休指厓山弔戰場，忠魂久已過錢塘。三仁可少文丞相，一死如前李侍郎。毒霧漲天橫沴氣，落星浮海散寒芒。孤墳最是無抔土，新廟依然有瓣香。

颶母誰懷國事憂回看夜壑已無舟山河滿地皆胡馬潮汐常時自海鱸空使讖書符四廣不教宗社復東周孱兵到此誰非死名姓紛紛惜未收

獨上高丘望大洋晚風吹淚濕衣裳何人忍恥修降表當日臨危進講章島國全身惟叛相潭州無事却勤王史家未識留燕意便把祥興繫宋亡

厲階千古恨遼金戮力終成國步侵鼎足一時撐海角旄頭中夜到天心間關豺虎魂空返寂寞魚龍共骨沉臣節屢書猶不盡欲將遺事託碑陰

次韻陸鼎儀讀文信公指南集

柴市遺祠凜若生艱危當日仗忠誠衣裁左袵慚相尙纓結南冠死却榮正氣自勝牢獄困颶風偏使乘輿驚從容取義真難事汨落陳編此日情

與諸友出城東散步水際

岸花汀草駐殘春步逐漁郎更問津側足岡巒渾不畏會心魚鳥自相親一灣已似江南意半日都忘洛下身西出郭門勞僕馬青山真是誤游人

再次韻答時暘飲後見貽

散吏幸無事合置荒園中著書忘其詞安復論異同牆下棗垂實颯然起秋風感時
忽搔首五十真衰翁投牒愧一出束帶隨三公晨趨揖東閣夜夢游南雍鄉使來吳
下入門偶相逢中懷不能語倚壁如頽峰南飛孰可繫仰見青天鴻
淙淙簷溜垂此事久亦寡移書防漏濕矮屋初墮瓦久旱雨固好墊溺念郊野況復
南樓人百步隔詩社清池下幽禽坐對共閒暇妙墨尙在函濁醪復盈罍持此欲就
之泥深沒羸馬疎慵幸免朝早謝鳳池賈風低碧篠叢悵望西窗下

喜原輝弟至京

時五月二日

遠道親携 裹來當門下馬拂黃埃不驚舊日形容改猶記前宵夢寐回出巷親朋
宜漸訪上牀兒子欲相陪平生四海尤憐汝得向窗前笑口開

大雨坐海月菴

卽看池面水平橋旋覺孤亭勢欲漂老父得魚過別市誰家移竹趁明朝西陵下馬
應難避

時世賢陪祀山陵北巷將書莫見招玉汝招飲吾弟遠來能慰我彭城今夜

憶逍遙

玉汝以予辭不赴次韻再約來日復和辭之

道上蹄涔接板橋詩筒將去却愁漂縱橫燕市雲爲雨彷彿巫山暮復朝半舫若浮
宜自繫尺書仍至故相招泥深我僕難忘蹶莫使前瞻馬尾遙

玉汝復次韵來速乃許赴再和答之

佳時已過鵲成橋菰米榆錢忽亂漂明月避人應此夜烈風欺客更崇朝須知木屐
平生着敢負皮冠舊日招終勝李侯蹲馬背披簑兀兀路遙遙

次韻濟之謝送决明

畦間香霧正氤氲童子清晨荷鋤勤不惜離披垂翠羽端愁搖動落黃雲藥名再得
宣公註書帶休從鄭老分病日向來俱有賴涼風吹汝莫紛紛

次韻時暘對雨喜晴

颯颯復霏霏清晨坐掩扉短籬垂豆角破壁上苔衣潤覺琴聲緩涼驚酒力微客樓
詩句滿未許沈郎肥

題啓南寫游虎丘圖

啟南初游靈岩遇雨明日既霽乃與海虞周景新游虎丘因寫此圖并有詩記其事
李貞伯云是日亦在陽山遇雨而歸陳永之謂雨霽日獨以事在陽抱山恨不能與
啟南同樂也皆有詩題其上景新寄予和之

雲巖不減靈巖好虎丘又名雲巖昨者胡爲涉行潦千人石上兩青鞵日出深林歌
杲杲一時取樂能償勞水西山北爭探討澗泉漱齒心亦清石壁題名手親掃西去
陽山十里遙冒雨有人歸不早明朝見話入雲岩扼掣捋須空懊惱好山不趁晴時
游此事已差何足道安知猶有獨游人隔水相望在陽抱何處移來此畫圖我方起
觀俄絕倒詩情畫意各有在歲月依然仍可考虫雞得失不須爭泡影死生難自保
永之已歿再到京華住六年匏翁頭顱欲全皓江南歸計有時成次第山行非草草
臥游且把畫圖開鶴瀾松庵亦天造翻嫌二客不能從回望周郎與東老

送張兼素出知施宗州

歲暮移家赴遠州南行誰復爲身謀一章之死無他悔六詔平生亦勝游科甲翻令
吾輩重史編應向古人求都門持此聊相贈不惜寒風透敝裘

分題豐樂亭送文宗儒太僕

何處亭成樂歲豐
琊琊山在亂雲中
西南林壑誇尤美
六一文詞信獨工
幽谷泉鳴琴操古
石屏路轉酒船通
幸當歸馬滌陽日
此地來游興不空

送原輝南還九月二日

清秋欲盡向南旋
別汨何堪重泣然
吾已行年當五十
汝今歸路又三千
亦知禁酒勝良藥
好爲修書附便船
舊業東城勞葺理
相期歲晚在園田

原輝行後晚坐有懷

東望秋雲壓柁樓
晚來水宿定通州
却愁細雨行裝濕
還恨深溝送騎留
臨別題詩偏覺懶
坐來呼酒不忘憂
惟應後夜生新月
兩地悠悠照白頭

渡沙河

橋下流澌玉一灣
六年從此照衰顏
疎林小店行厨到
落日平原獵騎還
韋杜南連多白草
居庸北距盡蒼山
天寒喜報王師轉
驛路無塵羽檄閒

望昌平

脫轡能凌千丈岡，解裘還耐北風涼。
迢迢古轍餘秋水，漠漠平疇又早霜。
日隱峰巒天易暝，樹連城郭路何長。
孤雲飛處梁公廟，猶似當時望太行。

入昌平學舍

繞簷蒼翠數峰齊，倦坐空堂意已賸。
高處川原渾歷歷，晡時風日稍淒淒。
行來假館先思睡，詩就還家各有齋。
苜蓿滿盤供飯足，坡翁休愛搗香虀。

題劉諫議祠二首

廩然毛髮萬言危，歎息名賢遠莫追。
甘露翻成他日變，清流寧受北司嗤。
古人爲鑑無如子，後輩登科又屬誰。
深夜高眠頻夢見，孤峰殘月照新祠。

門傍高槐向晚開，忠魂長繞故鄉來。
諸生入學供蘋藻，使者停車治草萊。
展卷不平新史贊，贈官空繫後人哀。
千年遺恨應難盡，誰念唐家有禍胎。

謝濟之送銀杏

錯落朱提數百枚，洞庭秋色滿盤堆。
霜餘亂摘連柑子，雪裏同煨有芋魁。
不用盛囊書復寫，料非鑽核意無猜。
却愁佳惠終難繼，乞與山中幾樹栽。

送楊君謙

子有好學名得之直從幼屹屹忘其疲每以夜爲晝誰令不自愛坐與簡編鬪旋致
心腹間有病見脉候鄉人嘗謂子文筆真似舅欽謨舅也昔養痾亦在掇科後七日
儀部官在告月日又服藥未見功具疏遂入奏昨朝獲愈音顏面喜欲皺西風作新
寒南去不可逗相過一何疎相別一何驟子去固欣然孰與箴老繆惟子有書癖舍
書莫能救譬如病酒人戒飲貌愈瘦何如稍飲之病去漸復舊子病偶類茲簡編實
醇耐茹多仍吐之紙上發奇秀三年當復來觀子所成就

謁陵宿昌平學舍

閉門無事謝諸生西舍支牀睡未成樹老不禁風勢急山高空負月華明連槽疲馬
時相嚙隔屋羣鷄忽亂鳴安得故人來此宿壁間持燭共題名

還宿學舍

夜深踏月到孤城塵土衣裳一振輕諫議祠空凡再宿廣文官冷又前迎思家不覺
心旌動紀事誰將腹稿呈肯信身逢長至節三年南望是神京

次韻任太常過園居四首

暑氣鬱蒸知嬾出肩輿只許到寒家
元脩席上能供菜
展節車前慣看花
尊酒長空非北海
冊書相對是南華
醉鄉不識茫茫路
始信吾生亦有涯

出土尙嫌瓜蔓短
灌畦方愛井泉深
門前有客馬長繫
牆外誰家屋俯臨
未必市朝生俗狀
只應魚鳥識閒心
好山移得聊相款
階石纍纍總碧岑

卓午風來特地清
槐花落處入簷輕
高荷久待蓮生子
香草不甘梅是兄
倒屣出迎翻失禮
解衣留坐更忘情
玉延自是吾家物
欲學盧公也爛烹

休笑吳儂故態狂
小園日涉步能量
閒憑却愛琴徽冷
連飲惟誇茗碗香
何日歸田成老嬾
終年學圃覺清忙
乘涼莫惜重相過
只待籬邊雨一場

對雨

清池水長欲平橋
雨勢渾如上晚潮
泛泛漸於亭礎近
淙淙真是覽泉遙
卽看並浴鵝羣戲
却恐新生魚子漂
東望菱濠歸去好
吳儂家有木蘭橈

次韻任太常致仕留別五首

歸去如公未當貧清溪碧嶂自爲隣地偏易覺柴門晚室緩先知布被春書爲長觀
成故紙衣從新浴少浮塵集雲山下吾廬在得向今朝置此身

此身眞喜置吾廬尙有牀頭一束書海口潮生知進退天心月到識盈虛已辭朝士
還通訊欲就漁翁更卜居百里好山俱在眼只教童子導籃輿

籃輿朝出看山初懶學陶潛去荷鋤新法不行誰執拗舊書無用是潛虛俗人自詫
才名盛老態終嫌禮法疎三月柴門無客到日高閒把白頭梳

濯足梳頭舊有緣更教午睡學坡仙一身自足三間屋百歲誰增半畝田適壑使回
憂險地看雲高坐愛晴天朝鷄官馬俱無用贏得工夫是晏眠

晏眠不覺過殘冬枕上哦詩做鮑溶猶喜形骸從小隱肯將名姓入斜封日中塵滿
爭爲市樹底陰多獨課農應笑丁公偏差異夜深腹上夢生松

劉文安公輓章

裕陵初策士高步入詞林科第前無幾聲華直至今唐人當陸贄漢代失劉歆碧海
瀛州遠青藜夜閣深義經千古學宋論一生心制虜無三表匡君有六箴紫垣初秉

筆白髮未盈簪自負心如水曾期汝作霖瘁躬方凡几盛世已駸駸俄作前楹夢難
將惡石鍼禮官公諡議士類雜哀吟墓有新題石家餘舊賜金斯文成落莫吾道付
浮沉後輩夫何恃先民最所欽玉堂嘉話在談者欲沾襟

清明日園中見杏花初開

疎花寂歷似殘紅病眼摩挲望欲空已恨浥開無細雨却愁吹落有狂風物華又報
清明節人世眞成白髮翁爲語天工須索性剩將春色慰人濃

懷林亨大謝鳴治謁陵遇風

天外狂風盡日吹朝陵有客正驅馳冥冥花樹春難見颯颯塵沙晚更隨官馬不愁
迷古轍奚奴應恨挈新詩歸來尙可誇寮友沾濕猶勝冒雨時

午朝次韵鳴治

衛士成行總面東朱門傳蹕靜如空高飛海燕紅雲近煖入宮花白日中華蓋逼時
瞻北極袵衣垂處詠南風銀臺奏罷諸司事旰食多勞念聖躬

和陸廉伯晝寢次老杜韻

杜老當時句宛然况逢四月稱高眠綠池芳草紛紛積白日游絲冉冉牽史館何人
仍僦直睡鄉無事莫開邊爐熏已冷茶烟起自笑閒官可質錢

早起次前韵寄廉伯

月黑頻將蠟炬然翻因夜短不成眠趁朝何補君恩渥出舍聊將吏役牽馬秣未看
騰櫪上鷄栖誰聽語墀邊江南一枕無殘夢欲向司農謝俸錢

和廉伯復次前韵斷夜坐

衰年視物更茫然日落尋常索枕眠久坐誰言纔斷絕細吟翻喜忽聯壺薰風作暑
如初伏海月生明又半邊却恨連牆稀讌集挑燈那送酒家錢

過西苑

松偃瓊臺不受塵虹橋綽楔記通津瀛洲水滿分裨海靈囿垣長接禁宸虎圈久關
空獸簿龍舟稀泛靜魚綸賞花未許陪游幸誰羨賡歌作宋臣

爲屠大理題石田畫

生絹丈許畫者誰石田老人今畫師年來都下家家有此幅吾知出親手筆意縱橫

信所之夾岸翛然已疎柳溪陰欲渡無舟楫萬杙成橋遠相接何處詩人跨瘦驂破
帽欹風粘落葉兩山對峙開高關豁舒梵宇容千間半空丹雘勢突兀雪竇天台眞
等閒老人昔共游虞山此景彷彿曾躋攀昆湖蕩漾臨几席水繞漁莊凡幾灣京華
十年走塵土看畫分明能破顏山林在望鳥飛倦春回江南吾欲還

送李貞伯致仕

引去誰謀及故人買田陽羨遂成真張公洞口終期我金母橋邊早置身郡志續修
知舊事鄉筵初會得佳賓百年風節人爭仰笑對秋波白髮新

送楊君謙致仕

公署席未暖求去何嗷嗷濟河先焚舟預賣冠與袍我不更勸子知子意殊牢昨者
見章疏陳情欲長號謂臣心腹間有疾刺如刀自宜鍼石惡不任簿書勞蒙恩賜封
典父母喜俱叨雨露不知感臣豈如蓬蒿壯年可驅策正合從時髦臣實自知愧奈
緣病相遭當道獎恬退幸爾遇山濤九重遂俯從孰謂天居高郎官信美秩視之等
秋毫未論子所能此足稱賢豪紛紛投牒者羣然赴儀曹其間或衰邁虛名尙貪贊

如子真難得識者爭嘉褒而我復增愧頭顱已霜毛歸心覺愈急如索更加絢子歸
免羈絆檻獸初奔逃叩首不回顧跳舞向林臯歲暮多冰雪長河阻輕舠河神不世
情助子水滔滔舊宅傍吳市門前是南濠性不耐居處志惟嗜遊遨南指天目山誓
將友猿猱歸來必自得自得有樂斯陶陶發洩胸中奇文場戰當鑿多事反自今筆墨肯
停操已忘虞卿愁且著屈子騷

閱周原已書札

斑斑遺墨宛如新安得交親更此人信矣行間渾茂密翛然物外最清真世家傳菊
根初斷公署聽鶯語自頻南京太醫院原已作聽鶯軒扶病玉延亭上坐槿花殘照
獨傷神

記園中草木二十首

槐

東園憶初購糞壤頻掃除牆下古槐樹憔悴色不舒况遭衆攀折高枝且無餘愛護
至今日濃陰接吾廬數步已仰視偉哉鉅人如非藉此蔭庇誰結幽亭居立爲衆木

長奴僕檉與榆

榆

始我種三榆近在亭之左西日待隱蔽陰成客能坐七年長漸高密葉已交鎖生錢
聞可食貧者當果蓏其一忽憔悴嚙腹緣蟻螺持斧欲伐之材未中船舵榆性堅可
爲舵藤蔓方附麗不伐亦自可古人無棄物守圃常用跛

檉

讀詩識其名誰謂材無用西戎每渡河此木能載重所以人字之一名西河柳豈在
作梁棟兩株倚東籬計亦七年種相對垂青絲驀地來二仲

棗

荒園乏佳果棗樹八九株纂纂爭結實大率如琲珠此種味甘脆南方之所無日炙
色漸赤兒童已窺覷剝擊盈數斗隣舍或求須早知實可食何須種檉榆此木頗耐
旱地宜土不濡所以齊魯間斬伐充薪藳近復得異種攣拳類人拘曲木未可惡惟
天付形軀良材却矯揉不見笏與弧

檜栢

檜栢性相似安論不同形城南久移植用以護幽亭檜也漸生粉栢兮復垂鈴幸非兩石間自足全餘齡古槐雖老大秋到卽凋零園空霜雪冷見此獨青青

槿

南方編短籬木槿每當路北地少爲貴翻編短籬護要知一物耳貴賤以地故夏末葢纍纍生意含曉露花開亦可觀別種更相妬獨憐一夕間顏色已非素葢多固應爾此理眞自悟不見萱草花開落只朝暮

榴

團團復亭亭園子巧相競都下朝千盆花市此爲盛我獨解其縛高枝遂其性叅差花史繁緋綠錯相映安石名已蒙休從謝公姓

竹

翛然數君子落落俱長身東家每借看步去不嫌頻移栽幸許我已自前年春自我得此輦園居豈爲貧但憂積雨霽日暴少精神終然勤灌溉枝葉還如新因茲悟爲

學黽勉在斯晨

丁香

花開不結實徒冒丁香名枝頭綴紫粟旖旎香非輕乃知博物者名以香而成或者樹相類惜未南中行初栽只一榦肥壤枿爭萌分移故園內不知枯與榮終當問來使亦欲如滯明

馬櫝椰

有樹吾不識人云馬櫝椰櫝椰產南海結實因瘴鄉平生冒其名豈亦如丁香白花細而密實甘翻可嘗其葉與麻同沃若澤且光麻馬音或譌欲問郭駝亡

酴醾

酴醾發長條叢生類薔草每記衆花開此種開獨早南方色多紅黃色見者少但嫌易零落蜂蝶食不飽曲闌強遮護童子日必掃花落當復開豈似主人老昔枉詩客來覓句步頻繞載誦成感傷誰來慰幽抱

刺酴

醯醢有數種同名而異字花開欲折難銛鉤如棘刺白者榦獨長紅者香更膩種之
小徑旁所恨胷衣袂揮竹加編縛步障差可類石家金谷園恐乏此佳致

葵

託身北牆隅幸免人所踐苗長已過牆入土根不淺葉間蕊何多濺濺滿圓蠟此種
覺尤佳觀者盡云鮮傾心識忠臣衛足存古典作羹諒非菜名同亦須辯

決明

黃花隱綠葉雨過仍離披不爲杜老歎未是涼風時服食治目眚吾將採掇之不須
更買藥園丁是醫師

黃連

花細山桂然階下不堪嗅野人斲其根根長節應九苦節不可貞服食可資壽其功
利於病有客嫌苦口戒予勿種茲味苦和難受豈不見甘草百藥無不有

紫芥

惟芥本菜類秋深掇而藏此種乃野生已向春初長紫花布滿地葉嫩亦堪嘗氣味

既不辛却與芥同行北人無不食木枿與艸芒入盤以油和齒頰流肥香

馬蘭草

蕤蕤葉如許豐草名可當花開類蘭蕙嗅之却無香不爲人所貴獨取其根長爲帚
或爲拂用之材亦良根長既入土多種河岸旁岸崩始不善蘭蕙亦尋常

朱藤

嫋嫋數尺藤往歲手親挿西菴敝短簷藉爾兩相夾歲久終蔓延枝葉已交接有花
散紅纓有子垂阜莢赤日隔繁陰偃息可移榻但憂風雨甚高架一朝壓霜雪却不
妨忍冬亦藤名共經臘

牽牛

本草載藥品草部見牽牛薰風籬落間蔓生甚稠繆誰琢紫玉簪葉密花仍稠日高
卽擎斂豈是朝菌儔陰氣得獨盛下劑斯見收便須作花菴誰與迂叟謀司馬溫公
獨樂園有花菴公自註以牽牛瓜豆爲之

蘆

江湖渺無際彌望皆高蘆蘆本水濱物久疑平陸無移根偶種植溝淺土不污縱橫
勿徧地葉捲多葭葦白花可爲絮長幹須人扶每當風雨夕蕭蕭亦江湖宛如扁舟
過榜人共歌呼浩然發歸興豈爲思蓴鱸

沈石田追倣黃大癡長卷爲林御史舜舉題

大癡道人顧長康平生癡絕仍畫絕長卷當年我亦觀大畧猶能爲人說山川歷歷
百里開彷彿扁舟適吳越平林曲岸客共游複嶂重湖天所設漁工樵子互出沒定
有高人在岩穴墨瀋淋漓拾未能信得畫家山水訣爲人說此亦徒然把筆安能指
下傳對本臨模未爲苦運思想象誰能專晴窗設色手自改輸與吾鄉沈石田

題許道寧秋山暮靄圖

遠山近山翠浪傾愛此萬疊秋初晴已多浮雲巖下宿只有暮靄空中生草樹紛紛
縱復橫風回落葉填礫坑哀猿啼處日將暝谷口不見樵夫行重洲複渚望不極漁
舟獨出沙鷗驚三山二水昔人句彷彿當時登石城何如攢蹙尋丈裏一目千里當
前呈畫家意匠勞經營墨氣濃淡皆有情平生見此真有幾不負長安許道寧殘山

豈合推馬遠寒林亦宜矜李成世間神品吾所遇沈老舊藏高克明二圖作配實相稱品格豈待宜和評嗚呼人言名畫真是名一笑頓覺千金輕

恭題宣廟畫所翁畫龍圖

黑雲作雨初收脚似有飛龍露頭角恍然拈筆欲寫之目眩金鱗仍走却所翁好龍非好真真龍自爲龍傳神小臣稽首不敢視龍去鼎湖經幾春

題赤壁圖

江流東繞千尺堤山鵲上結危巢樓游人夜半放舟過舉酒試說曹征西征西當年下江潯八十萬軍盡貔虎眼中見慣劉琮徒吳蜀區區何足數舳艫相銜千里連氣吞孫劉欲衝天豈知策士已旁笑笑彼遠來非萬全長江之險人能共不獨阿瞞兵可弄東吳會獵尺書馳權也難將首親送帳底拔刀軍令行如此奸雄安足驚周瑜早已借前箸黃蓋何曾論五兵五兵爭如一炬火北軍敗走南軍坐紛紛燥荻與枯柴乘取便風纔一舸波濤起立半天紅强艫灰飛一夕空平生親手註孫子未信水軍能火攻誰云此行纔足恥更聞裨瘡歸涓水玄武池頭計已疎銅爵高臺墳上起

當今四海爲一家三國爭雄真可嗟尙想綸巾巡壘堞猶將折戟洗泥沙武昌夏口
東西路畫史分明入毫素空餘赤壁付游人贏得坡仙作詞賦

春溪聚禽圖

春溪遠發春山中一夜好雨溪流通綠波泛漲渺無際但見桃花千樹紅鴛鴦鸕鷀
何容與散亂中流錦爲羽倉庚獨似避游人去踏花枝落紅雨草深哺子芳洲晴葉
暗仍聞求友聲展圖便有會心處放棹欲作春溪行玄裳綺衣彼何者爲戀高松倚
平野莫論鴻鵠志安知名字俱標在埤雅

登故友史西村小雅堂

路繞黃家溪水長春風洒淚復登堂草荒求仲常來徑塵滿元龍舊臥牀分手死生
嗟契闊傷心聚散覺淒涼高丘數尺栖神地碧樹爭凋不待霜

題陳憲副賣書圖後

過門作別意何如爲說嘉禾去賣書條過驛程輕是舸久知家具少於車古人糟粕
猶甞甚舊日筌蹄豈棄餘莫把賣書圖也賣要看清節正須渠

渡口驛遇風

黃沙障天天半昏
砲頭風急萬馬奔
何人去塞土囊口
天與河流一色渾
曠野麥苗纔尺許
只見風來不見雨
雨師風伯不相能
彼蒼高高奈何汝

歎右廂前枯梨樹

庭院陰疎日又西
條然相對有枯梨
霜前少葉遭虫蝕
月下無枝借鳥栖
不及蒹葭猶倚玉
爭如桃李自成蹊
吾生老態還同此
禿髻臨風句強題

詠吏部後園草木與屠公倡和

桃

城南春色曉移來
粧點園林錦作堆
嫩綠不須將葉認
淡紅已是當花開
玄都自發劉郎詠
幽谷還教謝判裁
此日公門深似許
畫長高鎖正掄材

梨

名果先從張谷來
紛紛碎雪欲成堆
淡粧自把娥眉掃
巧笑誰將瓠齒開
園子豈求他種接
主人能及時栽
天桃灼灼驚凡目
縞素應甘自不材

李

蕭森何處爲昇來曾帶荒園宿土堆燥壤豈勞長甕灌低枝不碍短籬開敢將艷色誇桃樹勝要清陰乞柳栽賴有當時仙種語爲薪莫漫比樗材

竹

種處能招鳳鳥來月明清影拂書堆筭鞭遇石猶斜出花米逢春莫亂開此物似賢今合薦吾家醫俗舊曾栽若從後圃論高節梨白桃紅孰取材

杏

花信風寒已早來隔牆俄見赤雲堆並頭兩樹長相倚屈指三春始得開曲水少年誰復探公門今日要兼栽莫言結實供人啖破核還堪作藥材

馬蘭草

難呼童子上堦來頭髮鬆亂作堆豐草舞風眞錯認繁花浥雨欲爭開長鑱荷處休教斷高岸崩時合用栽誰擬櫻欄爲拂子杜陵詩裏獨憐材

紫芥

滿目爛斑布地來，春風驚見錦灰堆。
菜根作苦終嫌咬，茗葉浮香爲撥開。
何處兔葵嗟競掇，昨朝馬蘭悔多栽。
傳聞此種番邦致，用向中華亦楚材。

醅醢玉簪

春色秋光遞往來，憑闌數尺土高堆。
翠搖釵股風吹墮，玉削簪頭露濯開。
山谷詩中那忍摘，唐昌觀裏合求栽。
花容清麗人爭愛，誰向周書問梓材。

牡丹

嫣然國色眼中來，紅玉分明簇一堆。
最愛倚闌如欲語，緣知舉酒特先開。
洛中舊譜頭須接，吳下新居手自栽。
若向花間求匹配，揚州瓊樹是仙材。

芍藥

品高真自廣陵來，舊譜空憐壁角堆。
千葉連雲如並擁，兩枝迎日忽齊開。
詩中相諱何須贈，擔上能賒也用栽。
記取今年纔看起，醉吟多藉麴生材。

太廟候祭復游東園

百畝園依清廟開，去年初夏憶曾來。
繁花落盡留紅葉，新笋叢生帶綠苔。
北闕倚雲

通劍佩南宮隔水見亭臺令人頓作山林想況有蕭蕭白髮催

哀文宗儒

吾鄉沈衢州遠致尺書在發書報文侯有疽發于背我憂體肥人此疾恐爲害猶冀有良醫或倚以致瘥憂懷適浹旬浙疏馳獨快乃六月七日死期特兼載哀哉此良牧天奪真可怪念昔爲永嘉勤政略不懈豪民戶先鉏淫鬼祠必壞撫下自有術百里免凋瘵及此領郡符先聲過疆界窮谷爭出迎耄倪總羅拜君初聞再起仕路厭行邁因察民情歎下車始無悔爬梳積弊源一旦決欲潰坐堂日孜孜訪問及細碎孰爲狼所貪孰爲蚊所嘬犴獄滿冤囚親手爲破械去歲東海涯光氣作妖怪橫飛類鬼車數丈無首戴具疏卽自劾遂及弊事槩謂此如許除吾寧自引退有司格不行當道有窒碍公退長太息空負民所愛吾惟盡職業庶償爲守債使民自按堵守法勿就逮百家立爲約禮義相告戒民曰賢侯言敢不各敬佩君終抱憂思弊事卒吾敗大者如鹽鍊骨髓竭稱貸彼力固已窮吾體亦真僊遙遙走一使求去乃至再知已總愛才不使投匭內孰知今日事俄有此變態凡君求歸休民輒嘆無賴羣情

達銓曹以及寮與案今也魂茫茫棺歸只空廨豈惟民無依失侶嗟我輩久爲晚年
期几杖作鄉會對酒乏清言臨事無善誨城西多舊游山色愁晚對有穴未及臨泪
盡繼以嘅

刻李貞伯篆書海月菴扁

篆法久欲絕李公得真傳近時鄉先輩彷彿如滕權昔爲我題扁握筆指腕懸顧盼
張髯鬚起立竦背肩俯仰爲陳蹟屈指十五年破屋垂雨溜庑牆上蝸涎三字被侵
蝕黑黦猶高縣海月夜照之墨光却新鮮正如公性氣精悍老猶然見物不見人吳
山隔重泉惜哉不可作手蹟忍棄捐壽以西川木良工善雕鐫庶幾如坐對仰面在
屋椽

題高房山山水

燕南蹙翠維房山高公昔者生其間戲拈畫筆少明豁玉女峰亞垂烟鬟積雨初收
隔春樹望見人家鳴邊住亦知中有王維詩行到水窮無覓處

送李世賢赴南京禮部侍郎

都門無計可留公況是秋來有便風尚憶陸機游洛下莫疑張翰向江東詞林前輩晨星少鄉社無人海月空定有天書還召入暫將留務託南宮

園中卽景

萍藻多從雨後生綠波常共小池平朱藤覆滿休輕剪待看繁花映水明

新製方竹杖

紫玉新裁恰過肩斑斑四面帶湘煙病軀藉爾能扶直巧手煩渠莫削圓世事固知方則止時人應道曲能全此生得免模稜諂晚節相依尙挺然

夜坐聞砧

何處疎砧隔短牆東鄰有婦搗衣裳風林落葉秋聲動露草鳴蛩夜氣涼久別官寮忘館閣每從兒子話家鄉強扶筇竹歸深院半壁殘燈獨上牀

招曹良金飯

曹君履憂患顏色何欣如學道想有得委命心常舒屬以公事至翛然寄僧居行裝止詩卷一僕身與俱西城隔風雨遙念夜堂虛自剔長明燈開函看佛書蹇予負老

病秋至歎歸歟坐上無清言何人能慰予明須就我飯已摘園中蔬

登廣福寺、佛閣望西山

城中過坊口時見山一面車塵半空起忽復不可見今日出城西初喜見山便恨當
長夏時草木更葱蒨遮胸如執圭隱首或側弁行行七里餘勝地得僧院仰瞻何突
兀餘閣俯高殿百級躡層梯身向西闌轉橫絕曠野中蒼翠爭自銜已將目力窮却
任脛骨顛羣山不知名起伏端可辨勢從西南來遙向西北旋萬馬如馳逐陣列如
鏖戰白雲與碧靄岩姿陡然變誰倩丹青人爲我展畫卷老至客京華宦游真已倦
若使入山行所歷豈能徧一覽青可了無如此中善

寄壽施煥伯七十

幼從鄉校託交游束髮相看到白頭我愧濟南非伏勝人言吳下有施讎高懷已見
開三徑遺愛猶聞在兩州少待登堂成一笑手持春酒獻還酬

齋居謝屠元勳送解家香

坐來齋閣欲清心忽對名香到夜深已似古人頻掃地更無俗客共鳴琴煖烟盤曲

絲繁碧細屑圓成箸削金始信解家真得法清泉餅莫送詞林

偶讀司馬溫公詩集有和邵堯夫年老逢春三首各以本題四字起句有感
于中輒倣而和之

年老逢春人共哈小園日涉去仍回牆邊槐樹誰家種籬外桃花特地開冰到泮時
終在沼石依陰處自生苔折腰最苦無筋力欲和淵明歸去來
年老逢春人更狂不登高阜卽平岡忘懷每怪言非淺好睡還驚夢不長過市墮多
如觸霧臨窗花少勝焚香長將短髮清晨理又聽鐘聲謁未央

年老逢春人自驚春寒不飲負良朋江南報到猶深雪都下聽來無早鶯司馬慣將
筇杖策堯夫來挽小車行詩成却怪昌黎語凡物鳴因不得平溫公游園常策筇杖
夏夜起坐

病首稜稜臥未便坐臨風露小堂前娟娟缺月初離海隱隱明河欲亘天憂早有詩
歌倬彼還家無計歎茫然夜深童子垂頭處獨聽城樓刻漏傳

病中

勉起難將職再供菴居長夏稱疎慵聊將消遣千行帖全仗扶持八尺筇天上雨來蘇病骨溪頭水長滯行蹤夜涼忽作江南夢聚塢靈岩紫翠重

次韻世賢和供字韻之作約顧良弼携酒來慰

久擬盤餐爲客供病中百事歎俱慵髮稀自落如枯葉病骨難支抵瘦筇老者安居猶費力諸公健步敢追蹤黃花酒熟須邀飲佳節遙期九日重

病後獨游園中

八尺筇枝在手中小園游處擬溫公離奇不合翻多壽僂僂安能更直躬足弱敢臨堦石亂眼昏渾覺口花空綠陰滿地聞啼鳥此樂何如與衆同

謝顧良弼李世賢携酒過訪五月晦

初伏將臨日正長肩輿同約到茅堂遠林忽辱來公子老杜夏日李公見訪詩遠林暑氣薄公子過我游小圃翻能致辟疆吳中有顧辟疆園王猷之徑造花下扶筇臨亂石藤陰移席避斜陽幽居無物相延欸綠樹成行晚更涼

再答世賢過訪之作

病臥空園兩月長何曾延客一升堂忽看棗實真成果亂揮榆枳已作疆自喜清陰
消伏暑誰期佳節到重陽酒酣碧碗深如許不厭冰漿沁齒涼

謝顧良弼送甘州枸杞

畦間此種看來無綠葉尖長也自殊似取珊瑚沉鍊網空將薏苡作明珠菊苗同摘
憑誰賦藥品兼收正爾須曾是老人宜服食只今衰病莫如吾

王少傳鏊

鏊字濟之吳縣人成化十一年進士及第自編脩歷官吏部右侍郎正德元年入內
閣進戶部尚書文淵閣大學士加少傅改武英四年致仕嘉靖初遣行人存問將召
用而卒諡文恪先生經學通明制行修謹冠冕南宮廻翔館閣弘治間文體春容士
習醇厚端人正士歷文學侍從之列如金鐘大鑪之在東序而中吳二公爲之眉目
何其盛也匏翁旣不得大用先生在內閣未久困于逆瑾不得志而去嘉靖初遣行
人存問曰朕行且召卿未及起而卒有震澤稿若干卷文章以修潔爲工規摹韓王
頗有矩法詩不專法唐於北宋似梅聖俞於南宋似范致能峭直疎放於先正格律

之外自成一家

春日應制

奉天朝罷曉曈曨，勅使傳宣籞苑東。
好雨晴時三月裡，蠻輿遙過百花中。
東皇默運無言化，南國新收不戰功。
歸坐明堂還布德，豫遊分與萬方同。

夏日應制

水晶宮殿晝沉沉，別院春歸碧樹深。
南陸迎長欽馭日，東臯早久望爲霖。
層中星火脩堯令，弦上薰風識舜心。
幾務了時多暇日，試開黃卷一披尋。

三十五初度

人生七十古來少，嗟我如今已半之。
來日更添如許久，餘生能得幾多時。
功名似鶴長遭退，學問如船逆上遲。
萬事悠悠只如此，青山能負白雲期。

遼城懷古二首

並馬尋涼過遠郊，偶從野叟問前朝。
雨摧故壘逢遺鏃，月暗荒臺夢墮翹。
千古河山還王氣，一時胡虜亦天驕。
如何宋紀年三百，獨讓周師過瓦橋。

小橋瀾瀾空流水往事悠悠紙斷垣冠蓋六州皆石晉河山百戰又金源黍離不盡
行人恨木葉空歸杜宇魂千古登臨成一慨幽燕今日是中原

送戚時望僉憲之湖廣

逢君未久送君行十載同窗幾日情平獄舊推于定國按刑新過漢陽城雁回千里
書須寄春到三湘草自生收拾楚材歸藥籠湖南賓客總知名

送楊侍讀維立之南京

二月南宮看柳條知君已上秣陵橋楊家製作多傳後蘇子文章合在朝夢草池邊
歌郢雪雨花臺上望江潮誰知東上門前路此後行來分外遙時予與維立同在內
書館

海蝦圖

茫茫大海浮穹壤日月升沉鼇背上其間物怪何所無海馬天吳大如象有魚如屋
鸞如帆蝦最細微猶十丈拳鬣怒氣須如戟力戰洪濤欲飛出江湖魚蟹總蜉蝣
眼平生未曾識畫工何處寫汝眞夢中曾到長須國黑風吹海浪如山魚龍變化須

與間從龍願作先驅去去上青天生羽翰

昌平劉諫議祠

荒灣野木古城隅何處昌平是舊廬氣帶幽并多感慨策如晁董亦迂疎同時下第誰云屈此外求言總是虛不盡懷賢千古意執鞭無路欲何如

胡人歸朝歌

兒胡兒女胡女女嫁胡兒娶胡婦唯有老身從漢來椎結氍毹裘作胡語當時從駕土木間匈奴驅我不得還朝看鷁兒嶺暮宿木葉山昔聞青冢今始覩幾過蘇卿持節處胡風獵獵胡霜飛聽罷胡笳泪如注胡中洵樂漢自親呼韓猶作南朝賓欸關不用通事語三十年前我漢人奉天殿前拜天子封爵歸來認鄰里南街北巷爭聚觀家人見我還驚起男襲冠裳女繡襦今日漢入昨日胡回思李陵并衛律漠北高墳空突兀

送趙栗夫歸省吳江

秋入吳江一葉飛歸來游子着朝衣鄉人始識文章貴仕路休嫌定省稀寶帶橋邊

舟汎汎白雲司裏樹依依路經震澤人應問太史周南胡不歸

送劉御史還蜀規

浮世功名何有哉茅齋元住少城隈逢人老去腰難折念母秋來首重回古柏祠前傷草色浣花溪上覓燈栽臨卽父老如相過不似當時負弩來

次韻楊維立初入史館

東角門前十館開史家自昔總難才病容野客隨行入遠喜諸公取次來氣合每聯朝食坐事多長後午朝回揚雄識字今誰及疑義須煩一一裁

贈河南巡撫楊貫之

熯災橫被十三州百萬蒼生手撫柔憲府乍臨新邑洛宣房已復舊河流衣冠南渡仍餘宋漚澗東來尙自周列郡分明望丰采安危須共主分憂

送高良新知歸州

江上青山識秭歸江邊吊古駐巖騑夢中馬耳先曾到行處人烟亦已稀屈子宅空江渺渺昭君村在雨霏霏使君撫字知多術夔府如今正阻饑

朱天昭始第進士主余家至明年移居西鄰

兩年不厭草堂低頗愛晨昏出入齊
長日經過無主客祇今相見有東西
濁醪尚可墻頭過歸院那愁柳下迷
廐馬似知人意思臨歧回首再三嘶

朱天成寄酒味變

橘林細擣洞庭霜風味清甘早自將
小甕紅泥緘遠意舫船玉粒饘餘香
督郵有郡還能至宰相何知合備嘗
猶勝先生號烏有車輪夜夜轉枯腸

贈梁都憲巡撫四川

赤甲白鹽雄作鎮鐵冠繡斧凜先聲
雪山已爲來時重黑水應聞去後清
殿上位虛中執法邊頭人散小團營
憑誰說與蘇明允畫像無煩記姓名

送吳大章還宜興

編修克溫父

試罷彤廷使乞還不教名字落人間
小團龍鳳春前雨罨畫樓臺水面山
文彩傳來多似舅功名老去只如閑
洞庭東望無多路楚頌亭成有舊顏

陳朝舊城

江東天險天削成長江爲塹山爲城南朝天子慎封守城外築城隨地形盤盤青山
出復沒築城密補青山缺龍潭起至金川門百里綿延城不絕青山四繞城四周鴈
飛不過神鬼愁北兵縱健無羽翼禮樂兵刑何用修益州樓船夜飛度雖有金湯沒
人戍

送倪尙書之南京

暫携堂印過江東冢宰權分位望同留守地當分陝重爲官誰在故鄉中家傳舊有
尙書履保副新加太子宮半世趨朝今少憩鍾山閑對黑頭公

避暑傅氏山莊次陸學士廉伯韻

偶然携酒作郊行纔出塵中眼校明歲月幾何新景象河山百二舊神京初涼道上
行人影斜日村中打麥聲一片渴心何處寫轆轤金井上銀瓶

送鍾欽禮還會稽

會稽山人其姓鍾丹青之外詩仍工若耶溪上弄雲水誰將姓字徹九重文華殿前
見天子受釐三日居齋宮東廂落筆風雨疾指盼屢得廻重瞳重瞳一分甲乙御

筆親書爲第一峰巒慘淡李營丘煙雲滅沒王摩詰詔令內府賜麟蹄又向邊城落
戎籍山人拜舞前致詞草茅何幸逢明時金坡玉瑣天上見惜臣老矣無能爲鑑湖
一曲臣所好細草幽花夢中到勅賜烏紗作外臣白石清泉恣游釣雲浩浩江悠悠
山人去矣誰爲留人生雖云故鄉樂大隱金門亦不惡君不見東方朔

五月七日陪祀泰陵

星樓月殿夜沉沉燭影爐烟儼若臨北極紫微尊自在西清黃繖夢難尋蒼梧天遠
孤臣泪玉帛星馳萬國心是日天下王府俱來祭十九年中游幸絕仰思王度式如
金

酒熟志喜

常年送酒媿諸隣斗覺今年富十分水法特教擔柳毅特汲柳毅井泉麴材先已謝
桐君麴不用藥床頭夜滴晴塔雨饗面香浮暖閣雲莫笑陶公巾自漉年來正策醉
鄉勳

徵明飲怡老園有詩次其韵

吳王鎖夏有殘闌特起幽亭據要津
剩水繞時傷往事短牆缺處見行人
綠楊動影魚吹日紅藥留香蝶護春
爲問午橋閒相國自非劉白更誰親

夜過西虹橋

破楚橋邊步偶停夜船燈火散如星
館娃歌舞今何處留得吳歌與客聽

十一絕句

白草茫茫走亂沙邊風獵獵動胡笳
燕山臺殿雖然好宣府元來我是家
少年天子重邊功烏帽戎衣手角弓
行徧漁陽井上谷並無虜騎到雲中
安化跳梁即日平中原羣盜敢縱橫
鴻都造亂誰堪使除是君王自領兵
彭蠡風颿一箭收九江安慶是安流
說與藩王徐送款親臣無數要封侯
縛得蹤王氣轉雄凱歌聲裡擁元戎
發縱不用蕭丞相合與官家第一功
燕雲漠漠鎖重樓八駿驅馳止未休
莫道十旬猶不返金陵原是帝王州
二水三山入豫游八方無事更何憂
秦淮流水悠悠在好與官家造酒樓
三顧頻繁亦未閒金陵東下是金山
分明鉄甕頭邊路載得賢人與共還

趙普元爲社稷臣君臣魚水更何人難虛雪夜相逢意海錯猶堪佐酒巡
北固山前駐翠華殷勤來訪相臣家太湖怪石慚多倖也得相隨載後車
賡歌千載盛明良宸翰如今更煒煌漫衍魚龍看未了梨園新部出西廂

程侍郎敏政

敏政字克勤休寧人尙書襄毅公信之子也十歲以神童薦召試 聖節及瑞雪詩
并經義各一篇援筆立就詔讀書翰林院官給廩饌李南陽以女妻焉踰冠舉成化
丙戌進士一甲第二授翰林編修歷官至詹事府少詹事先是臺臣論奏請退姦進
賢克勤在所進中用是見忌會雨灾言官遂指摘及之請罷免以塞天變詔致仕沈
啓南贈詩云人從今日去雨是幾時晴海內傳誦久之用師薦詔還歷遷禮部右侍
郎掌詹事府已未主考會試給事中劾其鬻題賣士請與廷辨事得白乃再請致仕
詔許之而盡斥言者未行而卒贈禮部尙書歿後闡事益白刑部主事鍾祥沈文華
抗疏伸雪士論歸焉克勤修眉長髯風神清茂考證古今精詳博洽追配其先龍圖
大昌近儒莫及也篁墩文集九十餘卷李長沙爲序他所撰輯宋紀受終考遺民錄

新安文獻志皆可觀惟著蘇氏檣杪方詆眉山以報雠蜀九世之仇則腐而近愚且比於妄矣爲賢者諱君子畧之可也

四月五日微雨免朝與李太史世賢步出皇城門喜而有作

輕陰小雨夜連晨中使傳呼散紫宸天氣薰蒸疑作暑風光回轉欲畱春班分輦道花迎佩仗出宮牆柳映人獨喜聯鑣歸去早六街消盡馬蹄塵

輓張世璉舍人

去年君家會隣曲芙蕖花紅池水綠今年君死藤束棺芙蕖花落池水寒明年花開對新主太息人生幾何許楚些招君君不來斜日虛堂泪如雨

聞南都新開池館之勝漫摘坦姪二屬對成詩二章

一川新綠板橋通更起盆亭著鏡中杜曲兒孫供酒盞謝家兄弟走詩筇草輦半涇莎庭露蒲扇輕回竹塢風勝日無因陪勝賞只憑春夢到江東

別業新開水竹居遊塵全不到庭除棟花臺榭聞幽鳥荻艸盆池種小魚翁醉不勞方竹引客吟多借古藤書何時罷直金華省日日江頭奉板輿

臥病七旬方起試筆作字適世賢有詩見慰依韻奉酬

獨臥空房思有餘茂陵顚顚舊相如病來自覺逢迎倦客至從嘖禮法疎風約黃塵凝硯沼雨催青艸上堦除讀君詩罷還成句棗筆藤箋試手初

朔州行送王汝璧太守述職西還

朔州城頭塞雲結朔州城下沙如雪赫連古戍白艸枯一路角聲吹不歇居民半是防秋兵十里五里屯軍營偏師夜坐烽火息飛輓小兒歌太平王郎家世本靈武明目張聲氣如虎羽林驕將不敢欺磧裏人畊好田土窮州十年多苦辛奉檄東來觀紫宸長官知名聖君喜邊吏有才能幾人遙遙朔州城勸子一卮酒馬蹄明朝向山後女牆孤月重相思定倚危樓望南斗

題安城彭學士山水圖

何人結屋青山裏終日開窗見山喜近峰錯落走鸞牙遠岫蜿蜒揮天嘴澄江一道山前過短棹平分浪痕破船頭水氣綠侵衣載酒高人面山坐石泉下衝沙渚渾桑榆接地成深村柴扉欲扣不可到或有細路通雲根竹鶴老人名畫手半幅生綃大

於斗水分山斷意無窮目送飛鴻度江口安城先生塵慮脫南望鄉人楚天關高堂
永日對山歌肅肅涼風起蘋末

傅家麵食行

傅家麵食天下工製法來自東山東美如甘酥色瑩雪一由入口心神融旁人未許
窺炙釜素手每自開蒸籠侯鯖尙食固多品此味或恐無專功并洛人家亦精辦歛
手未敢來爭雄主人官屬司徒公好客往往尊疊同我雖北人本南產飢腸不受餅
餌充惟到君家不須勸大嚼頗懼冰盤空膝前新生兩小童大者已解呼乃翁願君
釘餽常加豐待我醉携雙袖中

涿州道中錄野人語 良鄉役夫

我行范陽道水次遇老叟時當孟冬盡破褐露兩肘邂逅一咨諏向我再三剖哭言
水爲沴天意苦難究今年六月間一日夜當丑山水從西來聲若萬雷吼水頭高十
丈沒我堤上柳手指官路旁瓦礫半榛莽昔有十數家青帘市村酒人物與屋廬平
明蕩無有水面沉沉來忽見鐵樞牖數日得傳聞水蝕紫荊口老稚道波流積屍比

山阜遠近皆湯湯，暑墊弗可救。如此數月餘，乃可辨疆畝。下田盡沮洳，高田剩稂莠。
農家一歲計，不復望升斗。官府當秋來，催租不容後。嗟嗟下小民，命在令與守。更有
觀風使，仰若大父母。見此如不聞，恐或坐其咎。我民千餘人，血首當道叩。始獲免三
分，有若釋重負。奈何急餘徵，日事鞭毆夫。征又百出一，一盡豪取悲哉。一村中，竄
者已八九。老夫家無妻一兒，并一婦兩孫。方提携盡可慰，衰朽豈期天不弔。一旦遂
窮疚，一兒水中沒。一婦嫁隣某，兩孫鬻他人。償官尚難勾，老身自執役。有氣孰敢抖，
反羨死者安。苦恨生多壽，詔書開賑濟。奉者有賢否，終爲吏所欺。此食亦難就，與其
餒填壑，不若舉身走一飽。死卽休，寧復念丘首呼天。一何高呼地，一何厚我聞。老叟
言垂涕者良久，恭惟天子聖化澤，被寰囿聲色。弗自御，游畋敢誰誘。稼穡深所知，眞
如古明后。庶徵豈不諳，一變故非偶。無乃諸臯夔，此責當敬受。誰謂斯民痛不可事，
燐炙我亦食人祿。深慚結朱綬，豈無致澤心。無地可藉手，立馬野踟躕。悲風動林藪，

過石門橋鋪

道上人稀日出遲，弊裘風起不勝吹。馬行冰地如臨鏡，鴉啄霜田似閱碁。野寺鉢時

鐘隱隱誰家畔處塚纍纍晨門一去無消息佇立河有梁所思

嚴州道中

山遠沙平水似煙蓬窗贏得梳書眠暖風一日初黃柳好雨連宵賸綠田傍岸鳬鷺如送客隨家雞犬不驚船相看便有江湖戀畔鑿娛親在幾年

度東山嶺

石橋駐馬問田翁一塢深深隔樹東帝子閣前沙似粟野神祠下路如弓疎松古磳風微動細草陰厓雪半融回望紅塵才數里不知身在亂山中

宿資勝寺與王文瓊進士夜談

載酒朝相過論心夜未中臥殘禪室冷談徹講堂空香篆銷輕縷燈花落小紅好懷攄不盡鐘起院牆東

古城驛遇南京叅贊機務兵部尚書薛公詩以送之并謝惠粲

樓船三月下江東獵獵旌旗煖受風林壑有情歸謝傳廟堂何意起裴公貔貅作隊迎新詔龍虎分疆擁舊宮幕府勦勞應日盛軍儲曾贊幾元戎

賤子乘奉上石渠喜逢先達艤舟餘當牀幸展梁生拜乞米寧工魯郡書岸雨綠苗
方淨好水風黃柳共虛徐相逢無限通家意請向諸郎報起居

莫雨夜泊

黑風擡山雨如注未到下邳無泊處暗中雜遝人語聲且逐淮南漕舟住淮南漕舟
三百強粉字舵樓成堵牆輪更轉箭鎖相續似覺人人嫌夜長滅燭悠然倚牀坐遠
村曙雞聞一個前途早有役夫來岸東相呼岸西和

徐州飯管洪尹珍主事家有懷亡弟

去年過彭城朔風蕭蕭征馬鳴今年過彭城東風渺渺扁舟行漸覺此身爲客慣才
見花飛又花綻南去北來曾幾時隨陽却似雲中雁九里峯前春草芳百步磯頭春
水長偶然一飣剪銀燭行河使者尙書郎逍遙堂空誰作主感慨當時對牀語歸來
展轉不成眠獨倚篷窗聽風雨

夾溝道中

獵獵風帆水滿塘明明春岸柳成行連村犬不驚薪女傍渚鷗全識糧郎官旆聚舟

多漕運野田空屋半逃亡推篷不見青山色始覺風光是異鄉

題蔡揮使所藏林良雙鵲

老木長梢半空起影落君家素屏裏枝間雙鵲不飛去似向高堂報君喜涼風曉入庭戶清主人坐對宛有情眼前豈獨惜珍羽耳畔忽疑聞好聲亦有娟娟白頭鳥相顧裴裒若相保廣東畫史深可人生態無窮意難了主人堂堂眞壯夫喜受文士相追呼征蠻不帶嶺南物衣衾之外惟此圖堂下有兒堂上母客至矜圖飲醇酒呀然一笑共平生崔白邊鸞竟何有鵲兮鵲兮不可求願君身共張梁州不須椎石取金印看爾生封忠孝侯

古箭渡

古箭渡頭春水急古箭舖下春泥溼風吹一道雨微收黑壓四山雲未入郵亭餘韻聞竹雞肩輿扶過蒼崖西行人道側亂相指雨陣復來雲腳齊

黃鶴山樵爲沈蘭坡作小景蘭坡孫啓南求題

在昔蘭坡翁結屋斷崖軼俯聽溪閣遂仰眺巖扉敞天機久已熟眞趣可誰賞頗聞

黃鶴山樵斧隔林響居然駕小舟來趁夜潮長相對喜忘言欲去愁孤往揮毫意不
極線素大於掌高松發天籟哀壑生夏爽撫景尙如昨斯人已黃壤逆旅開畫奩斜
陽落書幌高風邈難扳題詩寄遐想

題蒙泉岳先生葡萄 先生在謫時所寫

劉郎未撤輪臺戍使者年年向西去宛國傳將馬乳來漢宮始識葡萄樹茂陵石馬
秋風寒玄香冷落黃金盤後來尙食不到此當時價抵千琅玕鎮夷城頭初罷鼓謫
仙揮毫氣如虎一番風味眼底生萬斛驪珠手中吐鐵面長髯誰比倫慷慨便作涼
州春兔起鶻落總天趣日觀之徒空逼真願子珍藏無艸艸謫仙已逐秋花老臨池
不覺三歎嗟前輩風流到今少

周德章駙馬府賞海棠

冥冥花霧擁迴廊冉冉猩紅隔畫牆按譜更誰爭有韻失評空自說無香莫燒銀燭
驚春夢好障丹紗護曉妝僊種北來初識面臨風拚醉九霞觴

遊王司言國賓郊園

風逗黃雲漲麥川井分新綠繞瓜田
童穿牆缺携壺到客趁堂虛借榻眠
樂憩午陰憐困馬預傳秋律愛鳴蟬
城樓咫尺忘歸晚多少詩情落照邊

功臣廟下作

雞鳴山側英雄坊朱門半掩青松長
功臣廟食自洪武下車進謁開中堂
元勳佐命推六王儼然並坐徐與常
左李右鄧沐再少霜髯獨見東甌湯
秉圭服冕垂衣裳異姓聯翩如雁行
公侯十六分兩傍金貂玉帶相輝光
瓣香一炷三歎息却走苔堦觀畫廊
竭從眞主興濠梁材傑奮起奮龍翔
長江飛渡入建康血戰往往皆鷹揚
當時陳虜號最强屢仗左纛乘飛艎
諸公一舄番水陽不日降旗來武昌
神威自此若破竹僭竊次第歸天亡
按圖未取東安乃下令先縛鹽城張
遠清閩廣服蠻徼繼下滇蜀連氏羌
東南畧遺瘡瘡息中土久作腥羶場
臨江發兵二十萬直指幽都驅犬羊
裔戎豈敢敵王旅氍毹裘北遁居龍
荒乾坤一統成帝鄉九州入貢紛梯
航文孫繼承萬億載諸將之功何可忘
禮官四時奉蒸嘗令典與國同無疆
錫封賜履遙相望山河帶礪分天章
至今一二傳世芳餘者中微殊可傷
安得司勳徹聖聽兩漢故實芸

編香摩挲丹青落日黃一時際遇思明良陸機有頌愧莫續風雲颯爽天茫茫

發昌平

出郭先登亂石岡凍雲垂野日蒼涼田畦冬盡猶慳雪陵樹年深總奈霜寢殿四圍
山色近御橋橫截磴聲長齋居依舊西風下鵲鷺相聯第幾行

錢舜舉清暉堂所寫戲嬰圖爲臨淮顧謙賦

海榴花開白日長繡屏十二雲錦張沉沉午漏下初刻搔頭不整慵來妝一姬南面
金縷裳兩姬夾侍相頡頏頎然圍坐看兒戲斑管雕弧堆象牀三姬鼎足如雁行玉
階隨步鳴雙璫以口撫嬰愛入骨笑語彷彿聞昭陽一姬下坐收錦襠洗兒自與澆
蘭湯娟娟秀若化生子銀盆水煖芙蓉香一姬轉盼殊未央拭巾在手明吳霜小鬟
兩兩意閒適紈扇不動薰風涼茗溪畫史推錢郎柔思獨步丹青場摩挲舊本豈易
得流傳遠自清暉堂才人不說顧長康鑒賞欲博千金強螽斯鱗趾尙可作爲君擊
節歌周王

四月二十八日起屢賜鮮筍青梅鱖魚枇杷楊梅雪梨鮮藕

都城三伏暑方炎天上分鮮我亦霑緘發紫泥留榼筭香生青箬帶冰鹽南舟遠貢
來何數北客初嘗味更添爲感歲時繙賜帖不知殘日下疎簾

題陸廉伯庶子所藏墨梅

宋人寫梅工染地染出疎花得花意寒枝點綴縱復橫宛在江村立烟際元人寫梅
鐵作圖千玉萬玉相聯拳天機淺深各有態三昧定屬何人傳忽拭此圖眞宋手入
眼丹青未能有涼風未覺生衣襟古月猶疑照牕牖斷縑殘墨驚海棠當時價抵千
金強幾人豪奪幾懸購完璧乃歸君子堂多君家在毘陵住高潔平生似梅樹秀餐
亭上歲寒盟時約花神共來去我今歸臥新安山暗香正繞清溪灣北河水堅未成
往春夢夜落松筠間補之不作林逋老紅綠紛紛競妍好愧無佳句慰幽芳三復莓
苔被花惱

任月山五王醉歸圖

何處離宮春宴罷五馬如龍自天下錦韉蹀躞搖東風不用金吾候隨駕綵策烏騅
衣柘黃顏頰不奈流霞漿手戮淫昏作天子三郎舊是臨淄王大醉不醒危欲墮雙

擁官奴却鞍座宋王開國長且賢誰敢尊前督觴過申王伏馬思吐茵絲韁側控勞
奚人可憐身與馬鬪力天街一餉流香塵岐王薛王年尙少酒力禁持美風調前趨
後擁奉諸兄臨風彷彿聞呼召夜漏歸時嚴禁垣花萼樓中金炬繁大衾長枕已預
設帝家手足稱開元我聞逸樂關成敗狗馬沉酣示明戒二公作誥五子歌此意當
時可誰解仙李枝空人不還王孫一日開眞顏鵠原終古存風教珍重丹青任月山

春社謠

我家社公畔鑿主求晴得晴雨得雨今春作社神更歡值我一年新病愈牆下小桃
紅滿枝塘東弱柳垂金絲社飯炊香出茅屋臘酒一傾連數卮土鼓逢逢過林際醉
挿山花共神戲隔隣雞犬喜欲狂接席兒童相笑詈滿爇爐香焚紙錢大家再拜祈
豐年放臣敢道金馬客明日扶犁同下田

訪進士何斯復于歙北黃荆渡不值時斯復方以養親告歸

問路尋君徑出城過橋自得繞溪行小翻翠柳東風軟返射青山夕照明爲就江魚
長供母覽容沙鳥一尋盟前村種藥歸應晚欲話心期恐未成

沈啓南畫障爲張通守題 啟南自題楚詞一曲

石田老人非畫師胸中丘壑天所私揮毫便覺眞趣發意到豈借丹青施通守張君
畫成癖半幅生綃比全璧望中謂作雲門山游人擬辦登山展峰迴路轉溪流長誰
向石林開草堂風簷舉手欲相問扁舟載客來何方老人畫出今人上鄉評未數黃
公望一石俄成斧劈痕不類羣羊更奇壯石田隱處輕輞川秀句却是王維傳吳歌
一日變楚語幽芳懶鬪春花妍我從胥門八回過古寺長邀聽經坐老人不惜與畫
山擊節詩成幾人和尙方有詔徵遺才白髮蒼顏能一來還君此圖意無限停雲正
繞姑蘇臺

題罷獵圖

沙磧風高樹鳴葉馬放平原人罷獵解裝散出青草間兩兩胡姬映桃頰酪漿滿注
金叵羅侑飲似唱陰山歌雪鷹離條犬噬肉穹廬到處皆行窩大旆揚揚出烟表不
覺殘陽過林杪健兒自許力未疲翻身欲射雲中鳥打圍之樂樂未央挽弓握矢心
茫茫嶺陰直接賀蘭道馬上終老單于鄉當今聖人制諸夏八方無塵羽書寡但願

胡離似畫中莫近三邊古城下

題田家娶婦圖

逕草如烟柳如幕日上茅簷鼓聲作田翁遣女不出村東舍西隣隔墟落新婦駕牛
兒跨驢家人後擁翁前驅兒家舉酒攔道勸舅甥幾世同桑榆耳邊阿嬰私屬父肩
上嬌嬰肯離祖歡聲一路到柴關野伶山歌柘枝舞兩門彷彿朱與陳鄉儀簡古民
風淳華筵肆設競珠翠想見紛紛京洛塵婦饁男畊罷征戍安得移家箇中住長因
擊節頌年豐不作催租打門句

題戎馬出獵圖

黑山之北青海頭草木搖落風颼颼平原一望渺無際獵騎四踏黃雲秋戎王小年
面如玉彷彿當時李存勗錦袍白馬彎瑠弧一箭直應倒蒼鹿蒼鹿却走青羊奔沙
磧霜中餘血痕相隨兩兩奉驅策氍毹裘辮髮皆羌渾一犬騰身逐驚兔後騎韝鷹笑
相顧大家賈勇各忘疲倒載爭多不知莫健兒獨往先著鞭自期百發無虛弦何物
霜蹄忽星迸脫手落地仍欣然幾輛氍毹車駐山口應待歸來勸胡酒共燂熊掌炙駝

峰敕勒歌長出林藪歌長晝短樂未央
皂旗閃爍天蒼涼明朝移帳定何所擇地還
開新獵場方今聖人居大寶烽燧無烟罷天討胡雛長作畫中看莫近飛狐塞垣道

弔劉竹東後賦此

春泥半擁蓬扉開蕭蕭翠竹如新栽
百年老友不復見舊雨故人空一來
南郢歌工罷瑤瑟西湖詩板生青苔
感懷欲去重回首黃柳白鴉增莫哀

拱北樓 在天津城上劉憲副所建

危樓突兀中天起雄峙高城壓諸壘
登樓北望空濛間正距皇都三百里
直沽東去當海門九河下瀉鯨濤奔
一道科徵比州縣十連虎豹分營屯
天子端居不忘武敕遣提刑此開府
眼中壯觀忽歸然緩帶時來閱千櫓
四方玉帛趨神京千車萬舶無留行
題品休歌太行路麗譙却數天津城
憶昔文皇曾駐驛父老相傳至今日
憲臣初下新條章宿將誰諳舊軍律
城頭大旆翻晴紅城邊細柳搖薰風
我來徙倚不能去宸居宛在紅雲中
畫角悠揚鼓聲壯雉堞嵯峨日初上
掀髯聽講陰符經誰道儒生不堪將
檻外滔滔河水流酒酣擊節歌新樓
盛年相與赤心在范公敢謝蒼生憂

瓊花

貪看江都第一春
龍舟元不爲東巡
閒花亦自能傾國
何況當時解語人

驅車上東門行

雉堞連雲起
秦城屬漢家
更無丞相犬
猶有故侯瓜

迎駕次亨父韻

一聲清蹕下郊壇
閭闔齊開敞玉闌
十二鑾鈴陳路馬
三千犀甲擁材官
御爐烟裊一作爐烟散彩疑香霧
宮扇雲移一作扇影屯雲
護曉寒
最是詞臣偏近輦
龍顏春色有餘歡

元日早朝

宮鴉集曙彩
鞭揮一作彩鞭聲裏
曙鴉稀
劍珮森森拱太微
日晃一作射御牀明繡
袞雲回
鑾輅見青旂
鴻臚立仗傳三呼
馬監隨班控六飛
喜值芳年叨侍從
起居長許近皇闈

儲侍郎囀

嶺字靜夫泰州人成化二十年進士第一除南京吏部考功主事改吏部考功郎中歷太僕卿左僉都御史戶部侍郎再起爲南京吏部左侍郎卒于官諡文懿無錫邵寶爲柴虛集序曰公性行淳謹風度詳暇義色法言不可犯干博通古今自宋金元季及國初遺言故跡旁詢博訪歷歷能道欲采輯爲一書病未脫薨其言曰知古非難知今爲難通達國體者古難其人而況今乎其所述作託諸繚楮金石者皆公之餘耳邵公與公同舉進士同出于西涯之門並以名德見稱詩文爾雅亦略相似云

◎ 送劉東山先生行邊 三首

七月秋已肅北風捲黃埃歛茲數百騎夜過長城來我公調兵食慘澹旌旗開前驅初出塞點虜驚且猜平生職方畧聲徹單于臺况茲仗忠義山岳可使摧乃知折衝具廟勝先掄才吁嗟秦漢時無策良可哀

司徒來何遲胡馬已無迹傳聞夜來雨虜窟水三尺皇靈暢無外嗟爾忍爲逆豈無嫖姚將不殺乃奇畫常憂六月師須令十年積

天驕未能絕古人重守邊芻粟旣飛輓士卒仍屯田何爲肉食人此法日棄捐茲行

理軍實重見洪熙前吾聞塞下議詔許司徒專得志貴一時成功論百年丁寧誠邊吏中國方晏然

磨臺山中

牆低林木疎馬上見山麓朝陽曬我背蹊徑紆且復徐驅喜崖豁稍上驚峰獨何當
陟其巔一騁遠遊目閬風眇崑丘萬里疑可縮翻思下土人誰與洗炎燠歲旱不爲
霖白雲滿幽谷

靈山

靈山慕名勝曦午停征輶倒裝換冠幘徑往凌岩髡手披茂草開思逐浮雲飄迢迢
詣白塔獨立吹清飆迴旋休緇廬老屋依山椒野僧三四輩衲破形容顛共言山中
貧菽水聊今朝問渠何所戀且得避征徭

白巖扇頭次泉齋韻

黃塵走名都白日觸隆景雲山忽富眼便自出人境翛然蹇驢翁細路轉岩嶺疎林
劃空明一笑得人影我家柴墟旁南望長引領烟蘿繞茅屋江月閑漁艇栖栖恐無

成題詩聊自省

登雄縣城樓二首

高秋愜登眺平楚動悲譌樓櫓何年廢前朝爭戰多雲閒青海戍塵淨白溝河翻笑
咸平際金繪滿塞馳

雉堞倚雲平關河控古城獨憑秋閣迥千里暮山橫灑落平戎策淒涼歎塞盟瓦橋
遺石在覽古若爲情

涿州分司夜坐

簿牒相仍急沉迷眼欲花籠燈猶閱馬廳樹已棲鴉強半春爲客饒多夢到家却嫌
塵土流無地汎僊槎

武清院中睡覺

麒麟歸苑寂蟋蟀近床鳴往事夢中復暗愁閒處生篝燈留掩映城柝遞分明此地
還追憶秋窗曉月情

彭城有懷

清夜棹歌發高秋客思生綿綿鄉國夢歷歷水雲程老樹危蟠石衝波怒嚙城白門樓上月偏傍海東明

涉濟

河曲風無定船扉掩復開岸花衝絮落沙燕掠波迴詩思逢春亂鄉心苦病催分流從此去欲渡且徘徊

春晦連日風雨贈別四首

風雨彌昏旦韶華暗去來病多空意氣事往半塵埃西郭園初筍南湖水盡苔今朝覽明鏡更覺老相催

春去年年別顏衰日日侵稍期全晚節已媿負初心江郭行雲暗湖田冒雨深柳陰晴處坐聊和老農吟

病較芳時晚春含晦日陰曉鐘人不寐舊雨客難尋院溼蛛絲重庭虛鳥跡深平明添好況移竹滿西林

殘春猶兩日欲去且相畱脉脉難爲別匆匆可自由天涯芳草路花外夕陽樓誰道

文園客新來賦倦游

懷舊何處觀燈好 四首

何處觀燈好分曹建業年
春星低觀闕晴雪映山川
鄰曲筵長接城隅騎每聯
憶同江水部終夕咏紅蓮

何處觀燈好臺城並騎時
酒邊看夜戲花下聽春詞
火樹璇霄發松棚綵市移
遲遲南陌上明月鎮相隨

何處觀燈好琳宮禁籞西
星橋通碧落雲網綴丹梯
梅畔春猶寂松梢月漸低
傳柑誰得句痛飲憶宣溪
王世賞號宣溪是夕予同希大邦亮飲朝天宮西院

何處觀燈好風光帝里多
蛟屏圍寶炬鼉駕灑金荷
列第珠垂箔長橋螭枕河
誰家吹鐵遂月午更相過

遇雪將訪涇川

共抱王猷興相將訪剡溪
五更千里雪殘月滿城
雞戴笠人堪畫移庖酒自携
主人聞客至應掃竹間泥

再荅

宦邸聊堪隱危峰枕曲溪人情疑夢鹿時事怕聞雞夜枕牽詩臥寒杵罷酒携只愁
門外雪客至踏成泥

謝病久不出何時過虎溪解空忘塞馬臥穩却朝雞畫檣江春發青藜閣夜携雪堂
他日客阪步自黃泥

良鄉察院夜次壁間韻

不眠疑漏盡獨坐愛燈明好夜春連市微風月滿城凝香清燕寢落筆得蠶聲無限
懷人意迢迢到玉京

徘徊沙苑夕更喜駟星明雜虜猶遮塞王師未築城春田榛莽迹夜枕鼓鼙聲宛種
雖神駿何須慕漢京

次吳侍郎克溫天界寺別春

病裡逢春去持盃奈酒何空山花事晚晦日雨聲多謾誦劉郎句疑聞穆氏歌長干
舊僧在應記客曾過

江東朋舊少詩裡得陰何行輩皆稱老追隨不厭多香臺供燕坐花院聽鶯歌共算
餘春日還期載酒過

悼光孝寺然僧

老愛屏山律閒叅洞室禪幽居惟種竹淨社不名蓮院日畱殘局牀風掩斷編西林
耆宿盡懷舊一悽然

雨中寄興

范陽豪俠未銷沉總爲燕歌動楚吟白草金陵迷馬跡秋風賈峪隔巖陰十年未洗
塵隨脚萬事還經雨到心欲爲房山畱半日簿書明發正駸駸

大城院夜思

渺渺孤城入莫笳坐深游思轉無涯風高明月還生暈夜久青燈自結花雁鷺登堂
愁吏簿驛驢遮路擁奚櫬長安兒女應懸念過盡清明未到家

大房金源諸陵二首

奉先西下亂山侵澗道迴旋入莫林翁仲半存行殿跡莓苔盡蝕古碑陰秋山春水

風流遠大定明昌德澤深却是肯和解亡國穹廬黃屋恐非心
長白山高朔漠連金源風致故依然千秋魂魄猶思沛萬里丘陵却到燕感事重翻
江統疏傷心莫問靖康年幽蘭一燼雄圖歎汝水悠悠入墓田

宿呂梁有感

赤石貪緣宿呂梁黃茅轉盼失前岡百年身世如秦贅一髮功名媿楚狂投老計應
吾土好懷人情與莫雲長夢回多少關心處清鏡朝來有鬢霜

歲晚病懷二首

園居瀟灑復何求天際浮雲任去留病枕夜長妨穩睡吟筇冬煖散閒愁支離未就
歸田稿汗漫虛疑駕海舟五十五年成底事春風依舊屋東頭

海國栖遲歲又殘將心此日向誰安稻梁謀拙空垂翼松菊情多穩挂冠社遠漸驚
詩思減身閒聊得病懷寬清時事業諸公在羣盜中原莫謾看

穀日迎春

共舉春風第一觴東郊春到已韶光晴占穀日傾城喜暖近花朝滿路香寶字垂雲

天上帖青旂拂曉殿前行滄洲臥病何年起記得東華待漏霜

立春日

未試春盤且洗觴吹葭五夜待春光催花謾剪隋宮綵賜酒曾霑漢署香白髮銀幡聊作戲青衫竹馬自成行凌晨便有名園興獨喜喬松不受霜

十四夜小飲

病酒年來已覆觴清光今夕共燈光金牀花散千門雨華屋相傳滿座香準擬垂虹追輦步偶看走馬憶戎行飲闌欲借陽春曲消盡征人幕上霜

上元夕飲客二首

愛客曾畱臘底觴晚筵絲竹瀉寒光淡籠明月饒春麗小滬輕塵覺雨香何處風來花作陣誰家燈好妓成行開年共說逢佳境碧盃嘗新有蔗霜

佳辰留客競浮觴一飲先判盡曙光雲葉弄晴翻桂魄燈花烘夜吐蘭香盆瓊錯落筵前令箏雁參差曲裏行莫訝東君扶病坐故人投分比明霜

次克溫南宮賞魏花

南宮花發滿朱欄對酒先判十日看彩筆舊傳才子夢青綾誰道主人寒明妝向晚
圍紅燭妙舞迴春試翠盤空嗅花枝無好句東風應笑客衰殘

謝希大虎皮

風簷短札墨漸開多謝臯比撤送來食肉我非投筆相寢皮君有控弦材毫端擬畫
真難類座上聞談祇謾猜却笑病餘還戀闕車茵穩稱不須裁

白燕次希大韻

歸來海國幾陰晴顧影翻疑夢未明莫渚掠迴宜月澹秋林辭去著霜輕却愁太潔
還多忌所幸同羣不異聲十載長安衣化盡爲渠搖曳轉關情

次東園贈舍弟韻奉寄

南村露飲坐秋旻爭席翻憐父老醇把蟹醉時忘左手飯牛歌闋悟前身夜聞玄雁
初驚歲老共青山不受塵明日客來還對飲床頭新漉滿烏巾

送馬侍郎歸故城

西掖東曹疏幾封秣陵回首寄行踪懷歸當擬瓜期及算老誰能蔗境逢去國衣冠

非寂寞過江舟楫且從容攀援欲詣三山別閒看浮雲結晚峰

再荅王掌教

舊築郊居傍水涯脩門回首望來賒枯腸戒酒因行藥老眼耽書故著花便整冠裾
趨紫禁祗慙名姓污黃麻北山猿鶴應相笑早晚移文到爾家

荅夏郡博

夢裏仙居接兩涯海門山好向誰賒丹霞掩映千年樹碧澗縈迴十里花雲外聽人
吹楚竹洞中留客飲胡麻醒來忽捧堯天詔憶在台南第幾家

荅李郡博

嬾慢吾生亦有涯市杭村酒未須賒閒消永夜詩還草暗喜豐年雪又花抱病敢祈
同犬馬掄材直擬到桑麻只愁屑屑煩來往貽笑東京博士家

陳情奉旨仍許病痊起用感媿之餘再次前韻

數行濃墨灑天涯未許爲農去國賒老病三年南楚艾春晴二月上林花每慚左轉
頻虛席已幸西垣不毀麻溫詔拜看重感激微軀何以荅皇家

再荅寫懷

臘酒初封半坼泥。惜春連日醉芳溪。鶯林謫斷停杯待，花陣香來滿袖携。
楊柳偏彩箋，多詠。蠶調成錦瑟，肯干齊南游。暫借江山助，未必青冥羽翼低。

又分韻得多字送杭東卿

飛樓突兀挂明河。西北雲山入檻多。絕頂危巢欹鸛雀，夾城流水帶蒲荷。
清商掠樹驚秋到，明月看人奈別何。坐撫佳辰懷遠道，送君須待醉時歌。

倣古意仍紅藥韻

粉壁紗窗隔樹看。儂家門戶近長干。錦機文字縈心苦，青鏡鉛華駐景難。
濕地梨雲供夜寂，一簾蕉雨閉春寒。吳舫見說歸來穩，水長橫塘昨夜寬。

張道士山房

正月九日冒雨過張道士碧雲山房。蓋別十有五年矣。剖柑命

酒酌予夢鶴小樓。追念舊游凋謝殆盡。道士今年八十有一而康強如曩。

時奔走塵途者固不如閒居之佚也。感歎之餘爲賦四絕。

不到青林十五年。長松垂鬣鶴成仙。江東舊事憑誰話，坐盡銅盤一穗烟。

芳樹青青二月時
林扉衝雨記吾詩
紅塵消盡長安客
留得雲房老鍊師
十日連江雨不休
雨聲隨處種閒愁
拳簾欲待晴時去
不爲春寒不下樓
徙倚詩成午照餘
仙家官府半樓居
醉來也有回仙興
自擘黃柑蘸酒書

舟中題畫贈錢員外仁夫致仕歸吳中

清泉白石舊成隣
謾謾松風洒鬢新
行過溪橋須稍待
長安恐有拂衣人

三月晦前二日晚出城

爲惜年光自不支
西樓誰唱送春詞
出門何處無芳草
欲倩東風住少時

郊行

淩兢瘦馬踏春泥
雪後郊原綠未齊
一抹午烟風隔斷
野雞聲在竹林西

七日寶應有懷

湖雨吹風洗暮煙
渚禽驚浪逗行船
舊時酒伴飄零盡
莫怪春愁到客邊

古城驛

野水微茫斷岸平
幾家相對掩柴荆
不須候吏沙頭報
驛站懸知是古城

北風

一路輕寒二月中水南桃李不曾紅怪來河朔奉光晚吹過花時尙北風

吳尙書儼

儼字克溫宜興人成化丁未進士選庶吉士除編修歷官侍講學士逆瑾中傷罷歸瑾誅召用終南京禮部尙書諡文肅性方嚴清慎文章莊重詩詞清麗可諷

次匏庵先生板屋韻

達官宜高居胡爲喜卑下豈是三命餘動欲循墻者天予固甚豐自取恒欲寡何必大廈成而後虛三瓦無梁架懷題無牖飾丹楮惟有窗隙中尙能通野馬鬼瞰非所憂客來可延坐看雲數捲簾看月疑乘舸溫煥不知冬通明復宜夏有書常滿牀有酒常滿罍自讀仍自斟高情還自寫豈無數仅堂得志弗爲也

齒落

我年六十一已落第三齒若更活數年所存知有幾剛風着唇吻利與劍戟比豈待入腹中而後疾病起譬若建重門一扉常自啟外侮窺其間孰禦而能止又若築長

掘隙穴不容蟻今已決尋丈不竭安肯已或言死與生其機不在此不見張相國齒盡乃食乳髻亂若編貝或有短折死此雖釋吾憂終焉非至理齒落竟何悲不落亦何喜但願不腫痛叫號動隣里食物有所妨肴核宜棄置朝夕啖粥糜其味固自美出言有所妨對客宜少語況我之所病正在傷煩易憶我初落時掩口含羞恥只今落已慣與不落相似作詩記歲月亦漫戲云爾

聽鄭伶琵琶

鄭伶名價重江東五百梨園伎盡空子夜猿啼殘月白上林鶯老落花紅江頭商婦愁無限塞外明妃恨不同可惜曹綱今去遠何繇兩市鬪西風

陸詹事深

深字子淵上海人弘治乙丑進士繇庶吉士授編修以祭酒充講官講畢面奏閣臣改易講章令講官不得盡職左遷延平府同知歷副使布政使召還以太常卿兼侍讀學士扈從世廟南巡掌行在翰林院印御筆抹去侍讀二字進詹事府詹事致仕諡文裕公少與徐昌國善切磨爲文章有名于時工書倣李北海趙承旨品隲古今

賞鑒書畫博雅爲詞林之冠遺文百卷外有河汾燕閒錄玉堂漫筆諸書傳于世

夜坐念東征將士

長河乘夜渡貔貅兵氣如雲擁上游大將能揮白羽扇君王不愛紫貂裘十二關山齊故國百年疆域漢神州不眠霜月聞刁斗自啟茅堂望斗牛

五七哭桴

六齡携汝卽辭家能變南音語帶華時向西雍觀振鷺遙從北闕認朝鴉乾坤有恨容啼鳥風雨何心妬落花莫向故園傳此曲年年寒食海西涯

秋懷四首

碧草幽花滿故園南山臥對久忘言年來行李書千卷老去生涯水一村已辨弓蛇還石虎母煩怨鶴與驚猿秋光更比春光好蜂蝶紛紛不到門

斗帳香消病骨輕少年憶得賦秋聲青藜火暖西風勁白玉堂深畫漏清上帝雲霄陪絳節仙人星漢溼金莖高山流水空瞻遡紙恐涓埃報未成

六代三吳業已荒英雄遺恨水茫茫試量秋興愁多少始信年隨鬢短長江上野鳬

爭得食山中叢桂早含霜長門本爲黃金賦賦就長門却自傷

一翻風雨報園林岸柳汀蒲半不禁鬼魄漸隨華月滿鳳棲應戀碧梧陰清商律應
笙歌細白苧功多篋笥深起向推移占物候爲誰先有歲寒心

山堂晚晴觀楫兒作字

論文說劍更爭棋五十年來兩鬢絲無事可爲甘袖手有山如畫且題詩望中禾黍
秋風粒夢後芭蕉夜雨枝小几映窗承落日雙鉤古帖坐教兒

和汪有之園亭之作

一區猶愧子雲才薄有茅堂傍水開遠訊經秋憑雁到問奇長日有人來好花隔岸
飛紅雨新笋穿籬迸綠苔同上玉堂俱出牧却從郊野望蓬萊

途中

曉行不知程夢醒聞細浪曙月逐鷄聲櫓歌來枕上

李少卿應禎

應禎名姓以字行更字貞伯長洲人景泰癸酉鄉舉入太學中官牛玉請爲塾師固

拒之選授中書舍人詔命寫佛經抗疏上言臣聞爲天下國家有九經不聞有佛經也陞兵部郎中尙寶司卿太僕寺少卿皆在南京引年致仕貞伯好古博學篆楷俱入品格卒之日無以歛友人文林史鑑買地以塋焉

東禪寺

松杉滿院風瓜豆一籬綠不聞車馬過時得高人宿日暮還獨歸悵望城東曲

和丘時雍太守

解印歸來草結菴逢人便欲口三緘髯將半禿寧忘世骨未全消尙畏讒別墅貯春常載酒晴湖泛月不張帆年時種得梅千樹要看花開雪滿巖

春日山村晚步

寂寂柴門草色新深深雲樹鳥啼春夕陽西下東流急不見沙頭喚渡人

成化戊戌十二月十六日與吳原博史明古張子靜游陽山入雲泉菴觀大

石聯句

巖巖者大石李奇觀人所誦遐想十載餘吳初游四人共舍舟始登陸張杖策不持

韃是時日當夕史茲山氣逾滯入門信突兀李拾級駭空洞落星何破碎吳靈鷲宜

伯仲仰觀神欲飛張俯瞰心屢恐鱗皴苔薛剝骨立冰雪凍史神驅道擬呵李鬼劈

文錯綜尊嚴凜君臨吳張拱儼賓送環列盡兒孫張擁護等僕從欲假愚公移史諒

匪雍伯種臥鼓慨桴亡李對白怯杵重猊吻訝未收吳龍鬣怒難控凝血疑痛鞭張

立肺詎冤訟上漏還啓窗史中通自成術大惟補天功小可矜肌用分矢肅慎來李

浮磬泗濱貢張廉利並攢劍兀隄側倚甕嶧山辱羸秦吳良嶽遺汴宋截彼民具瞻

張壯哉客難奉史落照紅抹赭歸雲白流汞張僧講點頭鷹李將射沒羽中塵緣契

三生吳陣圖懷七縱張在懸太師擊攻玉詩人諷仙煮充腹饑史俗摭免腰痛張峯現

產維揚吳琅玕出乃雍高題少室名李怪作東坡供半空見玉螭千仞附青鳳張栖

禪餘百年間僧僅三衆憑虛圍曲闌吳架壑出飛棟史竹幽補堂坳樹古嵌厓縫寶

黑炊烟熏李坎平鍾乳壅盤盤棧道危吳灑灑水泉動張登頓足力疲眺望眼界空

史松露髮欲濡潭月手可弄吳窮攀任生輒李醉吟微帶顛列坐對轡踰張大呼應

鎗碯嗜癖牛李愚史詩戰鄒魯閔吳拜奇得顛名史憂墜成噩夢吳試與扣山靈儻

售捐薄俸 李

文溫州林

林字宗儒長洲人成化壬辰進士父洪字公大成化壬辰歲與宗儒偕爲舉子宗儒舉進士而公大得乙榜官涑水教諭宗儒知溫之永嘉縣後改博平陞南京太僕寺丞告歸數年起知溫州府卒于官宗儒居官廉平所至見思在滁及守溫多所條上好交游爲詩文明暢不蹈襲居鄉與楊君謙李貞伯沈啓南善而其子徵明所與游唐寅徐禎卿諸才士皆尉薦之戊午春將赴溫君謙出餞虎丘沈啓南爲之圖啓南韓克賛複巾杖藜昌穀子畏舉子巾服朱性甫韓壽椿青袍方巾而君謙宗儒紗帽相對圖爲文氏世藏余從文起閣學見之前輩風流迄今猶令人慨慕云

舟中有懷林待用

渺渺長波映遠空依依新柳颺春風相思人在青山外盡日舟行細雨中汲黯身爲漢廷重杜陵詩到錦城工天王明聖江湖遠贏得驅馳兩面蓬

宿青陽驛

市冷人家靜途長客思增夜潮舟浸月寒渡水流冰破驛沈高岸疎林見遠燈空囊
寒食近瀚海一浮僧

靜海驛

深夜驛途靜長河瀚海通舟明沈水月燈暗落潮風暝色浮烟外春光欲雨中年
苦行役踪跡任飄蓬

寺中春

野寺沈深門半扃午窗慵起晚風輕雲開半壁夕陽出花落一庭春草生鳥掠池中
得魚去鶴歸雲外傍僧行馬曹散吏眞如隱咫尺山田帶雨耕

荷花蕩夜歸次吳水部德徵韻

採芳日暮未言歸處處村家揜杼機水漫蓮洲愁路斷月明莎渚覺鷗飛高歌小海
風波急回首橫塘烟火微蘭棹屢移罇屢倒不知露下已沾衣

永康

畫舸乘風入永康疎花綠岸一溪長山淘麥浪青重疊雲覺魚鱗白渺茫王事有程

行作吏勝遊無侶夢還鄉直輸漁父蘆汀畔斗酒渾家醉野航

金華道中憶君謙

遠別輕千里經行歷萬山思君終夕坐出守幾時還
隄柳吹花盡溪雲過雨閒南峰著書處夢裏更躋攀

寄壁

種菊庭中花有無小山松竹近何如痴拋獨樂了公事
悔拾浮名別故廬伏臘正懸歸老計經秋不得寄來書
眼昏頭白今如許料理而翁正在渠

歲暮客錢唐邦彥徵君以詩招飲席間因次其韵

隱君瀟灑有高齋徑造何煩折簡催雪砌宜人寒不掃
溪門待客夜還開離離燈火分春色奕奕梅花照酒杯
笑殺山陰王長史不逢安道爲誰來

後三日雪晴同邦彥遊西湖再疊前韻

雪後孤山共探梅便乘清興不須催林邊細路和橋斷
湖上疎花傍竹開雲影分明披絮帽蹄涔彷彿散銀杯
酒寬新量詩盈卷不負凌寒此度來

呂太常徽

憲字秉之嘉興人文懿公原之子中書舍人禮部主客司郎中累官太常卿讀書賦詩至老不倦有九栢集文徵仲嘗贈詩曰太常名家子英英蒼玉珣文章足華煥秉志亦堅完禮曹肅供奉弱冠已騫擢不受蔭補郎自致青雲端滁山詠列錦銀臺達糾彈所志必宜秉云胡不終安只應千首詩終古無能刊

次韻文宗儒感懷

靄靄山雲載雨濃雨收還對兩青峰隔林幽鳥如相語照水孤花只自容南陌春歸驚短夢西窗酒醒見高春儻參玉板禪師去連日東風長籜龍

十月寫懷

淮南十月類清秋最愛山扉霧雨收時事向人慵側耳晏眠如釋但梳頭將陳病狀求終養敢負王官傍此州記得先朝年弱冠殿中時引翠霓裘

己酉元日

三於郡國閱春正二載龍飛戴聖明北極紅雲香篆煖東風金水柳絲晴江湖臥處

驚垂老禮樂興期間兩生爲負消埃未歸去敝廬元有薄田耕

陸叅政容

容字文量太倉人少與張泰陸武齊名時號婁東三鳳成化間由進士授南京驗封主事改兵部職方郎中賈胡進師子奏乞大臣往迎諫止之奏奪二武弁資緣中貴陞都督者當道不悅出爲浙江右叅政復條奏兩浙不便者八事後以浮議罷歸文量好學居官手不釋卷家藏萬餘卷皆手目讎勘所著式齋集三十八卷菽園雜記十五卷子伸字安甫亦舉進士能讀父書撰式齋藏書目錄桑悅祝允明徐禎卿爲之序

感寓

松栽青鬱鬱冬夏不改顏園工徇時好移栽盆盎間屈爲虬龍形束縛苦不閒豈無培養恩適性良獨難吁嗟梁棟材誤爲花草看愛之不以道何如老空山

病中無寐用陸放翁韻

愁來失却睡膏肓坐此蕭條昔未曾傾耳有聲疑墮葉委心無物似枯僧風回別院

聞雞唱塵落空梁見鼠登數盡殘更誰是伴半窗寒雨一檠燈

嘗酒用前韻

飲盡君家碧瓮春香痕狼籍上羅巾詩壇不遣前盟負郎署應憐此會新歸騎已聞珂撼玉留人莫待燭銷銀步兵故有風流在傲殺金貂買醉人

次韻鼎儀東郊見寄

歸來無計買青山身在從渠兩鬢斑朝退已忘迷柳院夢回猶憶度榆關衰年坐我書千卷別墅無君屋數間小巷閉門心自遠也知隨處有商顏

和矢菴來韻二首

百歲光陰已半過更無英氣可消磨心粗自不容機事耳熱寧須托浩歌世味近知閒處好宦情終覺少年多東橋有路通三徑奈我才非二仲何功名適意片雲過措大風情老未磨斗酒盡時謀婦得小詩成後喚兒歌江湖萍散愁雲隔門巷苔深舊雨多高調數來吾已怯春風花鳥奈愁何

留天宮寺

閒遊幾日住天宮
簪步西齋雨又風
睡起牀頭書帙亂
興來牆角酒瓶空
冥濛野色迎寒碧
狼籍春痕吊落紅
別後只應如杜老
袈裟棋局念旻公

再至和前韻

此度停橈入梵宮
橘花香裏坐薰風
閒心頗爲江山奪
實理元非夢幻空
雲隱小窗禪榻靜
日斜深殿佛燈紅
留題欲和鴻泥句
誰復才情似長公

和彭性仁雜興三首

午夢纏綿臥起遲
晚山相對一支頤
飛花欲盡春歸後
啼鳥不驚人靜時
好雨每遭風廢閣
夕陽仍受月侵欺
同曹尙憶劉郎在
曾燕銀鐙夜賭碁

劉郎時雍舊寮也

一榻無塵四顧清
晚風涼似雨初晴
庭花解笑升沉事
梁燕疑諳故舊情
疏澹此心臨水近
卷舒隨意看雲行
清談莫是清吟好
不誤蒼生自瘦生

小巷閒門似隱居
曾勞長者駐高車
清風每至元非約
舊雨仍來亦未疎
廣廈萬間眞欠缺
起樓無地已多餘
長安儘有潭潭府
只貯笙歌不貯書

夜酌不能成趣輒命兒輩出韻引孟得二首

白雁南來送蚤霜江楓一夜換新粧風綠吹萬空人籟月欲成三過女牆秋蟻抱香
浮暖液荷蠶含蜜褪枯房茶鐙泣處聲如櫓錯認書齋是野航

四郊豐稔聽歌農尊俎無勞爲折衝且向座中成落魄肯將天下議中庸滿衣柑霧
香分釘百瓮梨雲暖破封華髮醉來搔欲短燈前披影看鬢鬆

用韻酬若庸

未有閒情學圃農醉鄉吟社敢當衝守官郎署成遺老託去詞林擬附庸玄圃不遙
當徙舍酒泉無恙願移封聞君近日緣詩瘦華髮星星革帶鬆

舟中閱送行卷次韻

海上東風送早潮孤舟回首故鄉遙江村雨候瞻山色客路春痕看柳條未有文章
裨袞職擬將涓滴助天瓢逢人又喜聞新事近日君王視午朝

與徐廷緯話舊

春風一醉故人樓轉眼重來十五秋酒博明瓊談故事畫傳昌歙記曾遊泉臺二子
空遺恨竹馬諸郎盡裏頭此去又成千里別玉驄臨發更遲留

邵寧書事

驅馬邵寧道蕭森值莫秋侵星勞跋涉入境徧咨諏土俗猶遺古民風近不偷圖存
思賈父開國重公劉鄉語多彈舌成人未裹頭土窖連板屋皮服混氈裘賓饌供狐
兔家貲視馬牛採薪登峻阪汲水自深溝原隰無餘利丁夫少暇休城隍依險設禾
黍藉天收訟獄公庭簡逢迎驛傳周兵戈幸未及芻粟苦征求庠序衣冠陋閭閻買
街稠有司相慰勞旌節暫淹留觸眼傷民瘼縈心病客愁道人今斷迹聊爲紀行謀

夜聲

微醺醒中夜獨寤當逆旅心清聽思聰聲動臆可舉輕噫疑林颺斜侵覺窗雨琤琮
僧塔鈴幽軋隣家杼杵擊暄邏兒剪擲鏗縫女隆隆暝行車橐橐宿春杵鼾睡人已
酣嬌啼兒欲乳悲酸或孤嫠咳咯將病軀布裂僮褊衾釜泣奴竊煮梁泥落棲燕橐
果嚙饑鼠拂樹鳥驚移含芻馬歎咀火煎蘭檠膏槽涓玉缸醕腹枵雷殷春耳眩蟬
吟暑宮壺沉此時巫鼓來何許趨朝傳鳴騶話舊接偶語百蟲薨然飛靈雞振其羽
衆音等天籟眞韻謝律呂賦愧擬歐陽聊以詩自叙

次韵楊考功雪中見寄

后土承天變司寒應候嚴同雲低布野密雪亂迴檐蕩漾侵池滅蒙茸拂樹黏陽和雖不競膏澤已冥霑色眩將迷鶴光遙欲妒蟾渭溝秦棄粉猗澤晉堆鹽頗愜瑤階迴仍愁郤屋淹獵原紛飏羽織室漾輕縑持節冷應苦扃門臥實廉紺園驚改觀碧嶺訝頽尖簪兔留新跡多魚伏有潛入歌難和曲愛舞漫窺簾屑下杭辭禮灰飛楮就炎軟紅連日淨漲綠與春添歸騎銀垂鬣行人玉綴髯微聲疑霰雜維細轉覺風恬照晚分燈力傳更錯漏籤六花千里遍三白一冬兼擬絮憐才逸充茶覺味甜熾爐身喜近凍筆手慵拈螟螣當深入來牟預可占冷魂馮酒喚寧避老饕嫌

登太倉衛樓

丁未六月十四日盛暑同監判用光揮使德昭二張君風乎衛樓二君舍酒而奕予不能徒飲因命仲生疏韻次以引孟始以壬字梗押構思久之既而檢曆適是日壬午不覺欣躍乃浮白自慶而成之亦閒適中一樂也聊書此以識歲月云

炎歊何可避爽塏自應尋樓閣新兵衛觀遊愜士林月同年在未日遇望前壬地勢

環江海星纏右昂參堂廉離地遠宇隙受雲侵百里歸遐矚千家屬俯臨半空能拔
萃寸木敢加岑天近青垂幙峰遙碧露簪石闌圍結蜃金鐸送鳴琳埤堦南闌值牙
旗北壘深彩旌縣雉尾畫鼓靜鼙音廢址傷伊昔宏規復自今折衝增武氣拱極寓
忠忱暑鬱方騰甑秋聲未起砧魯戈堅兀兀義馭恹駸駸哇病拋耘耨途休駐輦任
蝸螺枯井藻龜坼燥蹠涔欲聽檐領建須占礎汗淋浴波知馬樂譁樹翼蟬瘖世苦
乖龍匿誰將早魃擒溪蘇紛病艸投蔭集呀禽播水終非雨移牀且就陰滌煩思嚙
雪瘳喝幸沾霖大火從銷石清風抵獻琛乍來驚徹豁久坐覺蕭森緩晝忘揮扇良
宵擬抱衾几筵司赤老筆札侍青襟飲榼流香茗薰爐點細沉水芽鮮薦藕冰果脆
嘗擒飛肉收弦木潛鱗上曲鉞老饕慚入賦先酒願來歆賢已聊馮奕將歸謾託琴
萬錢虛大嚼一榻滯孤吟韻險偏凝思醪醇特費斟醉眸昏易暝便腹飽如姪偶遂
登高約因償眺遠心飲餘童子倦詩就主人欽河朔淪無節周南重不淫未須謀秉
燭只此勝懷金壑谷貽公笑瓊舟示我箴晚涼無限好歸興已難禁

送張企鵬之廣東提學

天語遙將度嶺南一方師表羨君堪潛回風俗觀新政樂育英才副昔談愛護襟期
同鄭老能詩標格近羅含少年科第曾誰負大好文章每自慚好士一生心耿耿閱
人多中目耿耿芹宮會講晨留榻栢府程書晚駐驂道路漫從瀧吏問姓名先得嗣
民諳蠻音啁哳初難辯海味珍奇素所甘畫鼓發船馴巨鱷青衿擁座聽春蚕文身
俗在能無教可語僧來不放參龍墨污唇閒吮筆鷹冠籠髮老勝簪數文聖代今同
契典禮儀替夙陋聃逢石只應呼丈拜畝泉寧復似渠貪花明蕉荔供行色味襍糗
羹當酒酣故國乾坤惟欠雪莫年山水定工嵐清風入誦炎蒸械化雨隨車槁瘁覃
駿骨收時忘牝牡色絲成後看青藍贈行已乏金兼百錢飲何妨爵過三往事莫言
溫室樹殊恩還憶上林柑鸞墀寶玉留情獻蜃窟遺珠借手探轉眼又期歸報最坐
移鄒魯到瓊儋

得鼎儀書口占答之

備數郎官未合遷校文太史亦虛傳邇來一事真堪喜皇子龍潛已六年鼎儀聞予
陸郎中亨父與修續通鑑以書爲賀然皆虛傳也龍潛云者時方有立儲之議人未

之知故喜而報之

送茶僧

江南風致說僧家石上清香竹裏茶法藏名僧知更好香烟茶壺滿袈裟

早過午橋口占二首

下馬金門步曉涼海雲開白看東方君王自有興居節不遣微臣一倒裳
花影西偏半月高不妨清夢起趨朝金烏未促龍樓鼓次第哦詩過午橋

南郊雜韻六首

兵衛森嚴萬幕屯馬嘶人語靜中聞天垣咫尺鑿輿近望見龍光入夜雲
臥擁明衣席未安齋郎早已報登壇君王行處陽春在不用靈犀辟夜寒
金鑰重門暫啓扃臘燈如晝辨人行象牌分得清班賜軍將無勞問姓名
竹宮幽邃寂無聲風靜空懸五色旌月色照人清沁骨萬松深處數寒更
紫壇雲霧切三台玉趾將臨畫鼓催列炬照天馳道遠佩聲遙自半空來
僊韶隱隱落空濛壇下傳呼拜啓同知是燔柴禮初獻沉香火起燭天紅

寄亨父二首

金馬門深晝漏遲石渠新草漢文辭
絲綸世掌多君在竹帛名傳爲爾期
匏葉颭牆風起處土花生砌雨晴時
革除舊恨成新樂木楊清樽頗費詩

金閨予告免趨朝石枕孤眠病未消
絲布小帷蠅不障竹枝團扇暑仍搖
匏壺汲水添森爽土盎栽花伴寂寥
革故題詩寄張敞木瓜應擬博瓊瑤

陸伸

伸字安甫

四月五日游淮雲寺儀上人限韻求題

得見支郎半醉中相將高閣詠南風
豈緣避暑追河朔自爲傷春到灤東
說法竿頭慚未會談經注脚喜能同
昔慧琳嘗註孝經替寧嘗陳說論語而師方開門以儒書授童子故云何年許入雲門社辦取青鞵出軟紅

題武氏畫鵲

聞道清時有寶申榮途送喜故能頻
如何只在蕭牆外不遇雕陵挾彈人

楊儀部循吉

循吉字君謙吳縣人成化甲辰進士除禮部主事善病好讀書每得意則手足踴掉不能禁人呼爲顛主事在郎署每稱病不出浹歲中促數移病長官厭而訶之卽疏請致仕年才三十有一居家好畜書聞某所有異本必購求繕寫結廬支硎山下課讀經史以松枝爲籌不精熟不止多至千卷作文淫思竟日不肯苟性狷狹好持人短長又好以學問窮人至頽赤不顧正德庚辰武廟幸南都問伶臧賢南人有善詞曲者乎賢以君謙對武廟立召之命賦打虎曲稱旨每扈從輒在御前承旨爲樂府小令然不授官與優伶雜處君謙恥之謀於賢爲請急放歸嘉靖中上九廟頌華陽求嗣齋儀報聞而已晚節落莫益堅癖自好寄食以卒自爲壙志年八十有九其詩文總自定爲松籌堂集會粹諸總類書曰奚囊手鏡多人間未見之書最爲該博劉子威王元美分得其藁今散佚不存可惜也君謙序國初朱應辰詩曰予觀詩不以格律體裁爲論惟求直吐胸懷實叙景象婦人小子皆曉所謂者然後定爲好詩其它餽飭攢簇拘拘拾古人涕唾者亦木偶之假線索以舉動者吾無取焉大抵

景物不窮人事隨變位置遷易在在成狀古人豈能道盡不復可置語清篇新句中競列特患吟哦不到耳君謙爲詩傲兀自放多闌入盧仝任華諸家不屑屑規摹三唐故其持論如此近代崇奉俗學以剽賊摸擬爲能事君謙斯言真對病之藥也余故表而出之

都下將歸述懷

鄙人自從三月來腹心久已病癥瘕晨興至午尙不食夜枕呻吟睡尤寡蕭然一榻但高臥雖有心曲誰與寫有人謂我病如此何不抽身向林野一聞此言卽再拜誰有愛人如此者久知山水淡有味漸覺功名輕可捨況今一病已到骨兼與世事多痼疾病人自合臥活命安能奔走還騎馬大凡決事在己心謀之朋友惡乎可乘今秋至天漸涼定買扁舟向南下諸君請自各努力余非引高母誚罵

答王君

王君憫我將南歸贈我以詩兼以酒忽言我實無所病托以圖歸貽朋友謂君知我不易逢乃此相疑一向否君以我樂山林耶我非忘世愛醴畝衙門晨入酉始出力

不能支空嘆愀上章得請誠幸甚向天再拜頭屢叩小臣蒙擢布衣內第以進士恩
太厚儀曹四月百無補空食廩祿顏可醜不因抱病無奈何豈敢飄然去官守君言
我意在爲文妄欲求閑營不朽人生奇偉任事業自局儒酸亦何有我今且去君亦
行淒風枯林月當九君有高幢盛僕馬我有空車載鷄狗出城分路兩不同一就官
途一林藪恐君謂我非病歸不惜叨叨爲君剖

初食楊梅

楊梅本是我家果歸來相對嘆先作往來南北將十年久不食汝幾忘却憶從年少
在吳中食以成傷難療藥年年端午卽有之街頭賣折先附郭初間生酸帶青色次
見熟從枝上落吳儂好奇不論錢一味纔逢傾倒橐生時熏蒸喜烈日所怕狂風陰
雨雪有紅有白紫者佳大如彈丸圓可握生芒刺口易破碎到牙甘露先流齟黃船
奉貢晝夜走數枚出賜惟臺閣其餘官小那得預說着江南懷頗惡吳人鹽蜜百計
收不知本味終枯涸肉存液去但有名奪以酸甜無可嚼我今到家又遇夏正是高
林雨方濯滿盤新摘恣狂啖十指染丹如茜着細思口實亦小事其來乃以微官博

使余不有故山歸安得香鮮列惟錯人生百年有適意忍口勞勞何所樂

寄賀故人新受河間學職

別君無幾聞君選知在河間更喜懽花邊郡城皆芡藕味多鄉物是魚鰻在京故舊
通書易按部尊官責禮難請得俸糧休別用多抄經籍老來看

新治小軒成

費將心力治齋居細竹移來葉尚疎雪白蟻光鋪榻眼鴉青布色染簾裾規模別出
經營外景物新呈晦沒餘鬆壁正防童稚汚粉牆還待友朋書今宵纔是題詩起此
席方爲讌客初前郭後村無曠地相過莫怪不寬舒

金山寺避暑望雨作戲效玉川子體

山中日日望雨至立向山頭看雲氣今朝且喜雨果來陰雲成片當天墜雲之來兮
奇且特有如推山而至遮盡半天黑黑雲上有白雲行白白黑黑兮重復輕不知黑
雲是風白是雨白雲多處先沾注雲中雨脚畧可觀數條當天大如柱此雲先自北
方起汗漫只謂太湖中來返頭看忽然風自東向來却把西方之雲盡吹散衆人觀

者都言苦日日望雨又不雨幸得一片雲推來自天北須臾變作大雲有黑亦有白
令人觀之恐怖生若要作雨不如此不得雨未至兮雷先鳴驚人不須用多只一聲
魑肝鬼膽不知在何處世上亦有奸人立不住樹頭蕭蕭風作鬧如今却是雨真到
吾且閉門高坐看汝落落到三日五日也不思

鵝湖口大風雨

溪風惡如虎力與林木閉其聲一何猛掩耳不敢受兼以疾雨至昏黑迷白晝偶然
在中途非前亦非後重重加覆蓋舟小還易漏自晨直至暮不容一伸脰昏昏蒙被
眠一任蓬且垢村墟斷往來酒食無可售幸有二三子清談首相輳不然獨高臥愁
寂誰與救古人曾有云終朝不飄驟何爲連日夜敗緒乃弗收客子何足道田間稻
方秀三嘆不可言只恐明日又

次日風不止

風乃天之威可有不可弄如何兩晝夜赫赫操柄用小舟亦何力乃欲當鼓動況在
四野間號怒聲亦縱蓬苦盡翻飛撈摘疲僕從客子不敢起臥久筋骨痛袞稠冷如

潑雙腳盡僵凍早炊告將及乏米自探瓮幸有文字携曾不廢吟誦晴明坐可待日影來隙縫人居忘道途於茲復淹壅因憶向所經一一皆成夢

除夜雜詠

歲除當此夜洒掃事匆匆井上皆封草門前盡畫弓祠堂神影掛客座佛筵崇撒豆祈兒疾存炊忌釜空辟瘟燒朮煖承俗燎柴紅敗篋新衣振除塵舊室攻買錫迎竈帝酌水祀床公春帖題鄉究年書誦學童挿籩皆栢葉戲火有梨筒殘曆收年盡深缸洗臘終市闌驕物貴鄰里饋糕通未識他州節於斯異與同

殘雪

殘雪經時久常聞簷溜聲謂晴堦又濕疑雨日還明地背融偏後宵寒凍復成不妨留莫泮借爾照書楹

抄書

沉疾已在躬嗜書猶不廢每聞有奇籍多方必圖致手錄畏辛勤數紙還投棄買人供所好恒輟衣食費往來遶案行點畫勞指視成編亦艱難把玩自珍貴家人怪何

用推却從散離亦蒙朋友笑既宦安用是自知身有病不作長久計偏好固莫捐聊爾從吾意有子雖二人未知誰可遺我但要披閱豈復思後世逢愚聚亦散賢必能添置區區慮遠心何其錯爲地不如供目前一卷有真味

題書厨上

吾家本市人南濠居百年自我始爲士家無一簡編辛勤一十載購求心頗專小者雖未備大者亦略全經史及子集無非前古傳一一紅紙裝辛苦手自穿當怒讀則喜當病讀則瘥恃此用爲命縱橫堆滿前當時作書者非聖必大賢豈待開卷看撫弄亦欣然奈何家人愚心惟財貨先墜地不肯拾壞爛無與憐盡吾一生已死不留一篇朋友有讀者悉當相奉捐勝遇不肖子持去將鬻錢

詠陽山雲泉庵大石奉和諸公同游聯句之作

偉哉此陽山有石俟歌誦形將冰塊截勢與蓮花共仰觀一何高登涉不可輟鳥飛必徊翔雲出自騰滂孤圓外成嶠空朗中含洞瘦如辟穀良清若食蚓伸深思殆天設乍至令人恐濃蘿作垂陰寒泉滴爲凍戴庵亦顛危携觴更交綜耳脇或駢攢動

拳時燭送巍巍上少並森森下多從荒厓始誰開倒樹諒非種在茲三吳間當以九
鼎重崇巖借冠冕卑轡聽提控勞呼猿罔匿被壓松堪訟曲躬始得門側身還入衡
拂苔劣容眠收乳兼資用志猶記秦餘材曷遺禹貢立久氣濕袍嘯高聲答蜚論年
越殷周言時晦唐宋一尊佛者居永作游人奉病宜謚著史寐稱搏養永四方傳不
誣諸公評切中臨谷足還酸乘巔目偏縱支頤詎厭看極口難竭諷鬼鑿手須胼鯨
負背應痛東岱徒小魯西華繆推雍懸磬風發明香爐烟結供曝沙伏靈龜食崗停
遠鳳是知隆拔羣所貴秀合衆偷餘殿容懷就隙亭閣棟枯藤蔓穿竅長蛇舌撩縫
輕盈受指彈玲瓏脫泥壅芾拜本無忝羽撼爭得動栽培植稀尺閑構架靡寸空炎伏
涼自生清秋月堪弄林深必賴燭嵐酷能作艷星光猶立芒龍吟殊叶檣嶺獅馴已
賓阜獐敢與闕久嗟隔勝賞頻勞落清夢即欲營終棲其奈懷微俸

見白髮

料應白髮有來時三十登頭似未宜愁已生根從汝摘老先呈態要人知莫勞曉日
梳千下終見秋霜起一絲若道只因詩故白鄰翁元不會吟詩

秋夜雨中

一陣復一陣蕭蕭忽然至空堂燈火昏臥聽惟獨自何哉人世間有此惡滋味能令
伏枕人百計不能寐一般聽雨愁天下無可譬鬱鬱沉沉然探懷却無事

松江道中紀事

余生信多厄浩嘆命可嫌二年不出門日白夜有蟾云何此舉棹風雨隨相淹嗟人
孰無友錢子吾所欣遙遙松江道勞苦亦已厭始自發松陵赫赫晨颺嚴橋門水西
吸吸舟向堤粘舡人紛運篙墮者幾欲殲心驚不得坐起視衣皆霑幸矣免亡失私
慶自理髻顧此皆官夫一死事豈纖人間列法網更乃議口僉無端負重責何苦傷
吾恬自從入舟來夢怪神不厭况乃四多風窗破紙若擣薪爐向榻置聊以充帷幃
于征既七日雲間堞方瞻言歸一何速墨突信未黔曉邁三十里仰視日已崦風顛
浪如馬纜斷猶揮鉅中流去飛疾冰楫人爭拈北牽返南驚似拔蛟尾潛役叱盡逃
散蔽彼村宇覘支吾不可使遺棄空牌籤因之發長喟俛然理有占此固鞭撻齊乃
費口語譴但我既嗜逸早識藪藿甜所獲良已多貴勢寧得兼此心甘無尤終不撼

冷炎田溝水鳴咽助我鳴漸漸朱涇暮雪下淒風刮剛鎌凋啾集饑鳥蕭瑟敲枯兼
冬溫乃愆候霰電真良砭晨興肆遠望縞野皆堆鹽三泐凍無波九峰高沒尖清冷
乏灝氣貯此天地匳掬來與人喫亦可療久疔窮游不終否果見日色暹經墟復歷
鎮時或蠹酒帘船將鼓笛具缶有鵝鴨醢尙可供一醉醉倒酒可添貧賤固多役未
得安閭閻近游亦不易平溪藏險險蘇松路何有棘若行陸鮎賦造合爾薄辭祿誠
非廉園居近脩築草屋新始苦殘冬積蒼翠松竹麓滿簷歸歟誠游歷請下君平簾
初春山居還城却寄支硎僧院

湖上

湖上魚吹細沫行湖邊花草足風情田分日影陰晴別水合天光上下清頗怪病身
逢酒健久留眵眼待山明農家識是游人過競擁籬頭送櫓鳴

榮公還金山

十年不出山一游卽千里問師何處來固亦偶然耳人言人閒好自愛岩谷裏紅塵日撲面洗眼無清水孤身本何將一鉢乃生理來旣無所牽去亦誰能止昨聞檀越船風帆欲南指則我從此逝飄飄白雲履我觀世間人孰不爲身使唯師乃不然來往由自己歸及枇杷熟憶我青林底

瓊上人還萬壽寺

京國幾時留匆匆兩月周禪從逆境打衲到暑天收作禮辭僧伴挑包上客舟將何償此役速揀好山游

旦公往寶積寺

古廟石湖邊爲僧今幾年開堂小游戲出世大因緣生死一夢耳江山常熾然遙知末句子不肯向人傳

果前堂南歸

雲水飄然一老僧頭顱種種貌稜稜人間正果修將滿天下名山遇卽登向外見來終不實從前學得是無能此歸莫向舟中結且臥隨身七尺藤

送楚岩往支硎山

昔有支公者曾爲此山客至今石磴上猶存馬蹄迹寒泉出傍澗散漫流不息何人作大字筆勢甚奇特岩岩圓通殿飛構爛金碧春來香火盛傾城出游適施錢日滿鉢來往恒絡繹世人競刀錐於此乃不惜我當少年時一歲嘗一即提携隨父兄娛覽常至夕別來已幾時何啻十年隔此山是名山先從晉時闢非有高行僧何堪主其席今師遂當往遠續前人蹟我今何以贈小偈聊塞責切煩大士前我爲啓胸臆慧眼無不觀是物皆潤澤如何不見我因此塵俗役願垂楊枝露灑我一點滴不愿官祿高不求財寶積但愿塵勞中早脫奔走厄無災復無難居家作禪伯保此清淨正永離種種色與師結晚交來著登山屐

鄂首座還山

病中承數過清話一爐香對食同甘菜忘形不下床壁間閒笠破門外倚藤方惆悵明朝別何人訪悶鄉

嚴長老歸寶積寺

黃蘆寶積寺創自鏡禪師佛殿已百歲僧房今六支寺有六房房各有名洞庭山入
牖笠澤水通池他日吾將到來題壁上詩

淨公住東隱

山水誰不愛顧乏能游人澗中本多勝石秀而泉淳向者雖一到終是居官身抱官
游山水味自不相親今子遂當往我亦解朝紳相從岩谷裏以子爲依因子有舊草
履我有新葛巾滴泉與片石務搜天所珍

政公虎跑開堂

人生何事大惟有生與死此事苟不明枉作眞男子政公自吳來其目定如水我以
爲有道延入禪室裏朝談復暮說句句堪入耳相知豈獨我亦有吳太史及今當南
還虎跑其所止我作送行偈且依世人禮伏請石田翁証明吾與爾

吳中普門長老乞語

普門在何處莫向海門尋只此吳城中便有紫竹林古以水與月而蒼白衣士舉頭
即見月掘地即得水朴哉明長老今往往普門濟度說已盡我復將何言雖然無可

言願且舉水月月在水中明此理分明說

百花菴主見訪

一春高臥只垂簾說著浮名病又添聞道百花菴可住他時借我讀華嚴

先舅大中府君己亥歲嘗製十四詠壽寶林叅老師八十今八年矣此老師
尙無恙其法孫定惠持此卷至都下敬作二偈以爲師壽

法鼓

維此鼓聲何所起擊之則有本寂然此聲既以擊乃生當其不擊聲何在用手執槌
以擊鼓二者和合始有聲如是究竟聲所緣非手非槌非鼓義智人在在勤修習於
一擊頓証菩提觀彼鼓聲成立相本自不生那有滅我愿仁者亦如是不以聲觀一
切聲晝安夜安隨在安長享耳根清淨樂

禪燈

法體光明無障礙譬如燈火破羣昏一燈能作百千燈百千燈自一燈化自百千燈
照一室其光無壞亦無雜如是乃至一燈照一室所見光亦然百千燈多一燈少而

其光體實不異是故我今持此燈愿獻寶林尊者前長令獲此大光明與彼迷生作前道

君謙儀曹幼時讀書吳城西金山中倦則取釋典閱之久而自謂恍然若有所得故其與佛者遇輒作佛語投之雖率爾韻語亦歸于是殆今日之宋承旨也丙午秋八月吳寬書于春坊朝房

趙按察寬

寬字栗夫吳江人成化辛丑進士第一人歷官刑部郎中出爲瀏江提學副使廣東按察使栗夫少有聲場屋會試出吳文定之門開榜日頗以吳士爲嫌主司召試詩賦下筆數千言葩藻奪目論者乃服有半江集行世栗夫常語楊君謙讀書了了見古人著述意自恨下筆不及君謙極賞其言

行臺日暮偶成

何處蕭蕭暝色侵海雲將雨過寒林間關旅雁天涯路寂歷啼蜚殘暮心槁木嗒然聊隱几飛蓬搔盡不勝簪松垣深掩黃昏靜惟有爐熏對苦吟

題盧溝曉月圖

銀河半落長庚明城高萬戶皆鷄聲長橋臥波熬背聳上有車馬蕭蕭行蒼烟淡接平蕪迥沙際朦朧見人影舉頭一望天宇高殘月蒼蒼在西嶺

王興化弼

弼字存敬黃岩人成化十一年進士除溧水知縣入爲刑部主事出知興化府興化多豪郡稱難治存敬律身端潔倣古循吏教化式鄉人劉閔之廬旌其節孝延至郡庭設賓榻尊禮之行之期年郡中大治旦日視事日中則郡無留人坐公堂讀書竟日而已病作民爭走禱沒羣衆哭甚哀立祠祀之請衣冠葬焉存敬爲郎時與楊君謙爲詩社君謙稱其忠信醇實神凝目定早有詩名才思豪逸後師山谷故多勦句造思甚苦與初詩骨格稍不同

贈龐生吹簫

寒星點點秋雲薄白日離離映寥廓哀商怨徵動高堂想見梧桐滿城落青年白晷吹者誰龐子風流妙音樂自從五月來長安久別吳湘舊江閣吳湘江上曾一吹江

水江烟青漠漠孤舟嫠婦不得眠四顧長風起蕭索紅塵向來聽者稀
喉龍啁如扇鑰秋來見月苦思歸不覺悲涼指間作此曲本自仙家傳
掠舟曾送西飛鶴燈昏夜靜初聽時小雨先來洗城郭明朝却上東坡船
此地憶君成寂寞縱有新聲何處聽蘆花月暗楓橋泊

二馬圖爲陳明之題

壯哉陳明之有此兩玉驄一驄色作葡萄錦一驄雪尾雲爲鬚咄哉明之此非畫兩
胡碧眼睛相射手中綠繩三尺捶人馬意態俱閑暇燕郊二月沙草春淡風艷日開
烟塵兩龍浴罷桃花水迺視八極生精神十年侍朝未央殿西北貢馬尋常見駑駘
豈有仗下材空勞萬乘臨軒看有如此圖誠不多舉足萬里無山河試令放馳九折
坂定與飛鶴爭先過神物不受人間役冥冥天意應相屬明朝卷軸送還君莫使春
雷驚我屋

次栗夫韵答一夔招飲

聞君東籬把寒菊對酒高歌霜滿屋尋常閉門嗔索詩此時下筆皆神速想爲悲秋

發豪興十斗九空驚侍僕不然浩蕩凌雲句豈是枯腸泥饘粥余時遠客范陽西土
醞作酸那慣服麻舍冷落幸無花若使見花增感觸紛紛胥吏羅我前縱有清吟誰
採錄興來只據小胡床仰視天際飛鴻逐今日歸來眼始開君有新詩盈卷軸況逢
新條急卯酉何得抽書清案牘我觀官府束縛人雖有良驥無逸足君於世事常超
然此意要是天下獨垣西往事花底尊何事猶煩致書促百年之內良可知日月如
梭走相續看我面如秋葉黃愧君髮似春條綠嗟我茲行亦跬步節序何嘗異風俗
如君此詩極可賞已自不及花前讀世故相尋恒萬端正似河沙難計斛後來離別
那可量風塵悠悠恨川陸我今作戒非爲花十事九不如人欲古人嗜酒稱酒聖任
渠嘲謗吾何辱

過半江菴觀鐵崖樂府花游曲次韵

花氣作陰春晝濛蜻蜓鬪影蘭苔風鐵笛老仙石湖裏雪色長髯映湖水美人牽芳
度水門硃紅藕絲新染裙蹋歌採探不成步歌聲下徹吳王墓蛺蝶隨香花底來白
蓮掌上眞珠杯清音震落碧瑤碗亂泉捲入銀星板老仙起舞山日西綵雲落筆留

春題酒醒不見玉堂使簷竹敲風僧壁西松香濕透小銀箋風流盡付瓊瑛篇

奉使保定諸公餞別屬予爲倡

平居雅愛重九名西城乞花過東城眼中一壺又長滿花開萬事余不管詩情酒量
雖不同冷淡竊比陶家風婦亦忍貧無諍語手壓糟床響秋雨諸君來尋意疊重舉
杯浮白不相容屈指算我行色近只恐歸來花已盡我醉突兀如堵牆請君作歌歌
襄陽

戲窗前小桃

小桃甚小能芬芳乃在主人廳柱傍忽然見此婉清揚使我廢書典衣裳去年柔弱
風中狂樊姬痴小未解粧綠羅衫袂紅錦襠一笑伴我窗風涼一春寂寞臥桁楊花
氣撲簾聞晝香水瓢竹格小匡床主人乃是江左王小桃小桃弗爾傷坐看明年廳
柱長

遊豹突泉

濟南歷下多白泉白沙幾處涵風烟郭西豹突更神異平地一朵白玉蓮浪花滾起

千層雪此中疑是蛟龍穴靈藏歲久變妖怪精氣上湧成涎沫餘波散漫澗復渟溪
風冷冽山雨青微霜初下雁秋浴落月漸低猿夜聽窮源我欲遡川陸舊誌虛傳自
王屋冥茫難測造化情聊寄泉亭漱寒玉

送楊儀曹養病歸東吳

楊君文如雪溪竹清圓瘦勁無不足筆牽萬牛又神速顧視餘子誠碌碌儀曹官好
有拘束神駒受控翻局促以茲氣鬱不得舒三月臥床手捫腹我知君病乃非病兩
度謁君呼起沐君言吾疾殊可怪合眼常見吳山綠即日上書謝至尊臣身頗類置
中鹿得報忻然心自賀明珠出泥還故櫝丈夫落落期千載不必紛紛空食粟

草堂對月分韻

明月轉西壁歌筵漸徙東一尊貧對客百事懶如翁雁噉霜華外虫棲露草中今年
秋更好才得此歡同

出城

今晨不爲閑遊出不爲閑遊興亦嘉帶雨青山十餘里傍雲茆屋兩三家斷流已作

方塘水舊雨猶殘半樹花欲借蘆根安釣石不知誰管碧溪沙

古意二首

莫作河中水願爲水上舟舟行有返棹水去無迴流
蜘蛛結網疎春蠶成密織密織不上身網疎常得食

古詞二首

妾淚如長江不洒陌上塵留取雙轍跡得認君車輪
君行轍不返妾淚長在眼試將眼中痕與轍較深淺

惜梅

獨樹牆西老更繁幾回相伴月黃昏東風只爲芳菲計不道飛花已滿園

次韻答蘇延平

百五又當寒食邊黃風濁浪滯歸船去年細雨梨花外記得江南中酒眠

次韻王袁州

獨抱餘醒似病眠急呼三百舊青錢綠楊影裏蕭蕭雨望斷同時載酒船

次韻陰僉憲夢游桃源

盡說仙源隔片塵誰知枕上是通津武陵太守無仙骨只見桃花不見人

便面

竹裏幽亭是我家門前白水浸平沙釣船順放中流下袖手船頭看浪花

胡馬圖

夜醉葡萄倚壁眠眼中胡騎忽翩然誰知慘淡寒綃裏中有黃榆萬里天

舶上謠

千艘飛過石頭城獵獵黃旗發鼓聲中使面前傳令急江南十月進香橙

書所見

水明烟碧萬條絲短岸斜風晚更吹紅面小奴牽白馬爲誰來繫斷腸枝

見素小畫次西潭韻

素公作詩故奇特石鼓聲牙字難讀素公作畫如作詩峭石挿天松壓屋

項進士便面

天光低碧暮寒浮峰色紆青晚入樓長憶清秋過上竺歸來明月滿湖頭

次韻范寧國戲答林憲長索酒

六年南海逐流萍不見天邊舊酒星聞道澄江皆鴨綠敬亭那放謝公醒

次韻吳諡德先生共月庵賞花二首

城市看春總未眞縱無車馬亦紅塵醉翁獨有閑風味管領東園樹底春
未從花下醉清曛忽憶東風動茜裙已按公詩知節候來年相訪在春分

柳中書山水小景次王修撰韻

永嘉山色秀成堆曾憶前年訪舊來何處最牽東閣夢一林松影覆春苔

次韻答李揆之二首

昨夜追歡一闋堂醉歸山月已無光朝來中酒無人問臥聽春鶯不下床
桴杙爐頭擁薄綿嫩寒微雨暮春天不知詩思能多少榆葉梨花已滿前

次韻匏庵先生共月庵賞桃花二絕句

斜月枝頭照返魂先生挾醉倚籬門花應欲識蒼然面莫遣風前絳燭昏

牆底芳尊歲合開杖藜歲約爲花來醉翁慣作頽然醉先報東風埽綠苔

陳高州章

章字一夔華亭人成化十四年進士授刑部主事歷郎中明習法比尙書何喬新重之坐原從卒犯法降瑞州同知遷高州知府移黃州以勘事詣雷州病瘴卒出不以罪又投荒以歿時論惜之一夔作詩醞籍典則時有真詣秋懷詩云人老漸驚生白髮家貧未辦買青山楊君謙以爲自然妙句君謙移疾得請諸公携酒餞別日暮雨作有七人聯句詩七人爲古直老人黃岩王仁甫海寧徐寬栗夫松江陳章一夔黃岩王弼存敬華亭侯直公繩吳江趙寬栗夫皆爲君謙詩友而一夔存敬栗夫皆出吳原博之門時時過從東園相與酬和者也詳見君謙詩記中

卽席贈趙栗夫

萊市街西新卜居豈棚瓜蔓共蕭疎胸中富有書千卷誰信家無儋石儲

答王存敬見贈

梅黃詩句可爭能素操兼看冷似冰他日期君何處是龍門寺裡一枝藤

雨中過匏庵先生園居

海月庵前景自清更看疎雨快吟情紅芳落盡還堪賞綠樹黃鸝三五聲

王山人佐

佐字仁甫自號古直老人黃巖人善草書作詩旅游京師客公卿間三十年不置釜
甌無僮僕意度率直不爲厓岸遇所會意欣然忘去李西涯作王古直傳又贈詩曰
長安信脚自來往醉醒不信東君誰其風度可知也麓堂詩話云王古直作詩亦有
思致題嚴陵曰天地此生惟故友江湖何處不漁翁遊西山曰舊時僧去竹房冷今
日客來山路生述懷曰窮將入骨詩還拙事不縈心夢亦清餘不盡然嘗與予和雪
詩蒸字韻數往復時出新意予頗訝之久乃覺其爲方石所助蓋古直時止謝家故
也因以一詩挑之謝乃躍然出和遂成巨卷古直藏而失之懊恨累歲邵郎中國賢
購而歸之古直客死方石盡鬻其書畫爲棺殮費而獨留此卷云

畫竹

瀟湘綠玉崑崙石移向高堂之素壁四座涼風帶雪吹半窗疎雨和烟滴九疑夢斷

瑤瑟寒貼雲影落雙飛鸞霓旌掩冉欲歸去美人持贈青琅玕也曾拂拭蒼苔色坐弄參差楚天碧曲終日暮山鬼啼自寫幽情寄相憶

己丑元旦過承天門作是日大風

淡日泊在扶桑邊四山浮雲來蔽天本是陽和變殺氣發出燥土如雲烟吾皇神聖來赫怒諸公飽飯日晏然去年五月南海翻九月三邊烽火連旅人潦倒衰暮年有懷明主徒拳拳袖中常懷書一編不得上陳徒自憐有時問天天不語仰天大笑龍樓前不如回去長安市上酒家眠明日收拾東歸理釣船

中年

纔過中年百慮輕獨于尊酒未忘情窮將入骨詩還拙事不榮心夢亦清萬卷豈圖金馬貴一竿當與白鷗盟灞陵賣藥原無意女子何從識姓名

謝□□省

省字□□黃岩人景泰甲戌進士有謁侯城里詩

答編修姪次韻

江湖飄泊二毛初半世謀身智亦疎
春意欲歸彭澤柳年華未盡茂陵書
孤桐自斃非時調尺牘誰能問客居
須信人生身外事落花殘雨向春餘

列朝詩集丙集第六終

封 底